
Kata Penaruh

Bujur sikateken man Dibata si mada gereja, ibas penemani ras penaruhkenNa maka gerejaNa tetap ngasup ndahiken dahin pelayanen. Enggo si bentasi sada semester pelayanen gerejanta maka si gejam enggo melala dahin si enggo si dahiken sue ras tahun program 2017 enda. Tapi ibas dampar si deban maka melala denga kekurangan ibas kita ndahikenca. Erdandanken sie maka ibas Pekan Doanta sekali tema umumta eme : **ERTOTO ULU GEGEH NDALANKEN PEDAHNA** (Matius 14:23). Nuate maka tema enda njiwai ibas kerina perdalinen Pekan Doanta.

Ibas teks enda maka lit perbeben Jesus kenca IA mere man lima ribu kalak. Jelma si enterem ateNa ngangkatken IA jadi pemimpin politik. Enda sada godan si mbelin man Jesus maka tawaren jelma si enterem tempa nawarken “la perlu dalam kayu persilang.” Guna mpegegehi nerusken dahinNa i babo doni enda maka si idah Jesus lawes ertoto. InanamiNa persadanNa ras Dibata Bapa janah ialokenNa gegeh si mbaru. Enda me pengarapen si jadi ibas kita ngelakoken Pekan Doa tahun enda. Si nanami persadanta ras Tuhan janah si datken gegeh si mbaru nerusken perdalinen pelayanenta tahun enda.

Pekan Doanta tahun enda pe enggo si benaken alu sada pelaksanaan si mbaru. Si lakoken eme kenca Tuhan Jesus nangkih ku surga seh paksa Nusur Kesah Si Badia (Pentakosata). Tupung sie ajar-ajar tutus pulung ertoto nimai janji sipadanken Jesus eme Kesah Si Badia. Bage me iarpaken kerina kita pulung ras-ras ertoto seh paksa perayan Pentakosta eme Nusurna Kesah Si Badia ku bas kegeluhenta sekalak-sekalak.



Pelaksanaan Pekan Doanta telu wari lebe silakoken ibas rumahta sekalak-sekalak (Pra Pekan Doa) eme wari Kamis-Sabtu tanggal 25-27 Mei 2017. Enggo isikapken ende-enden, renungen ras topik pertotonta ras-ras. Kenca sie maka menaken wari Minggu-Sabtu tanggal 28 Mei-03 Juni 2017 silakoken Pekan Doanta ras-ras bagi semalna. Ipindoken pe man BPMR gelah tuhu-tuhu erban sermon persikapen Pekan Doa enda. Labo terjeng Sermon Kata Dibata tapi pe radu ras liturgi ras ende-endenna gelah ipelajari tuhu-tuhu sope pelaksannna.

Moderamen ngataken bujur man Tim PPWG ras Percetakan Abdi Karya si enggo ngaturken ras ngelitken bahan Pekan Doanta enda, janah Dibata si tetap terpuji ibas kerina pelayannta. Bage pe BPMK ras BPMR si enggo ngaturken kerinana seh man banci erdalan alu mehuli. Soli Deo Gloria.

**Rikut Tabi Ras Mejuah- Juah,
MODERAMEN GEREJA BATAK KARO PROTESTAN**

Ketua Umum, Sekretaris Umum,



(Pdt Agustinus P. Purba, S.Th MA) (Pdt Rehpelita Ginting, S.Th M.Min)



DAFTAR ISI

Kata Penaruh	1
Daftar Isi	3
Liturgi Ras Renungen Pra Pekan Doa GBKP Tahun 2017 Wari I	4
Liturgi Ras Renungen Pra Pekan Doa GBKP Tahun 2017 Wari II	6
Liturgi Ras Renungen Pra Pekan Doa GBKP Tahun 2017 Wari III	8
Liturgi Ras Renungen Pekan Doa GBKP Tahun 2017 Wari I	11
Liturgi Ras Renungen Pekan Doa GBKP Tahun 2017 Wari II	18
Liturgi Ras Renungen Pekan Doa GBKP Tahun 2017 Wari III	25
Liturgi Ras Renungen Pekan Doa GBKP Tahun 2017 Wari IV	32
Liturgi Ras Renungen Pekan Doa GBKP Tahun 2017 Wari V	42
Liturgi Ras Renungen Pekan Doa GBKP Tahun 2017 Wari VI	49
Liturgi Ras Renungen Pekan Doa GBKP Tahun 2017 Wari VII	56
Tim Sinikapken Pekan Doa GBKP Tahun 2017	62
Lembar Saran.....	63

0000oo0oo0000



KEBAKTIN PRA PEKAN DOA GBKP (i Rumah)

WARI/BERNGI I , KAMIS 25 MEI 2017

**TEMA UMUM: ERTOTO ULU GEGEH NDALANKEN PEDAHNA
(Matius 14 : 23)**

1. Rende KEE 338:1-2

1. Kam ku sembah ulu tuah, ajar aku me gelah
Lah nurihi pujin kami, lalap la erngadi-ngadi
Lias ras keleng ateNdu, jujurkenNdu man bangku
Nteguh paguh la terundu, kuasa ras muliaNdu
2. Tetap aku daramiNdu, ban tedehNdu man bangku
Suari berngi ijagaiNdu, mbelin kal kek'lengenNdu
Di reh susah ndumpang aku, erlebuh aku baNdu
Minter nusur penampatNdu, erban teneng tendingku

2. Ertoto:

3. Rende: Tuhan Demi Aku

Tuhan demi aku salu KesahNdu
Tuhan demi aku salu KesahNdu
Pusuhku bagi tambe ku baba ku pancurndu
Tuhan demi aku salu KesahNdu

Tuhan demi aku salu KataNdu
Tuhan demi aku salu KataNdu
Pusuhku bagi tambe, ku baba ku pancurNdu
Tuhan demi aku salu KataNdu

4. Renungen : Perbahanen Rasul-Rasul 1:12-14

Tema : Tutus Ertoto

Sope Jesus nangkikh ku surga maka lit pedahNa man ajar-ajarNa "Ola tadingken kuta Jerusalem tapi timailah pemere si enggo ipadanken BapangKu, sue ras si enggo Kukataken man bandu." Pemere si maksudken Jesus eme Kesah Si Badia sinusur man ajar-ajar tupung wari Pentakosta. Nina Jesus tole, Johannes mperidiken alu lau, kam pagi iperidiken alu Kesah. Peridin alu Kesah enda igenepi tupung nusur Kesah Si Badia ibas wari Pentakosta. Tupung sie maka kerina ajar-ajar kedemen Kesah Si Badia. Kesah Si Badia sipadanken Jesus enda me pe si mpengasup ajar-ajar jadi saksi menaken i Jerusalem, Judea, Samaria seh ku belang-belang doni enda. Kenca ibelasken Jesus sienda maka iangkat me IA ku surga.



Mulih ajar-ajar i Uruk Seton nari ku Jerusalem. Janah tetap kalak enda tading i Jerusalem bagi si pedahken Jesus. Numpang ia ibas sada rumah nimai janji si padanken Jesus. Ikut pe diberu, Maria nande Jesus ras senina-senina Jesus. Ikataken ibas ayat 14 maka Tutus atena ras-ras ertoto. Tutus ertoto ijenda dua dampar eme alu erpengendes alu pusuh si dem (dengan segenap hati) man Dibata janah la erngadi-ngadi, la erpeltep-peltep (Junani : proskartereo=to continue).

Tutus ertoto enda me si ilakoken ajar-ajar ras diberu-diberu bage pe nande Jesus kenca Jesus nangkih ku surga ras ibas nimai nusurna Kesah Si Badia. Enda me palas man gerejanta pe erban pelaksanan Pekan Doa kenca Tuhan Jesus nangkih ku surga ras nimai janji Tuhan Jesus nusur Kesah Si Badia. Kita pe menaken wari enda erban pertoton teptep wari seh wari Raya Pentakosta eme nusurna Kesah Si Badia.

Pertoton enda me ulu gegehta guna ndalanken kerina pedah Dibata man banta. Tema tahun 2017 enda eme “Mengajar Untuk Melakukan.” Tema enda mabai kita gelah jadi Kristen si ndalanken pedah Dibata. La terjeng cakup ras ngerana tapi si dalanken peraten Dibata alu kinitenken ras kekelengen. Muat bagin kita pehuliken kegeluhen enda alu kai si banci silakoken janah meriah ka siakap ngelakokenca. Labo kita ngasup ndalankenca si enda adi la kin kita nggeluh ibas pertoton. Pertoton e me gegehta ibas erbahan si ngena ate Dibata. Emaka tutuslah kita ertoto. Tutus ertina alu dem pusuh ras la erngadi-ngadi. Labo ertina arus kita lipat tan lalap. Kenca kita lipat tan ertoto maka perlu “turun tangan” alias erdahin alu mehuli ndahiken buah pertotonta.

5. Rende: KEE 176 (iendeken 2X)

Ibas toto ku belasken, seh man banNdu Tuhanku
Ajar aku lah ngaloken si mehuli akapNdu
Pertotonku bagi Jesus, sanga bas kiniseranNa
Labo peratenku Bapa, peratenNdu jadilah...

6. Pertoton Syafaat:

- Gelah penenaken tahun program GBKP erdalan alu mehuli “Mengajar Untuk Melakukan.”
- Gelah kerina serayaan ras perpulungen GBKP tutus ibas ertoto.
- Gelah pemimpin bangsata erkemalangen man Dibata.
- Si lit ibas jabu.
- Pertoton Tuhan.



KEBAKTIN PRA PEKAN DOA GBKP
(i Rumah)
WARI/BERNGI II , JUMAT 26 MEI 2017

1. Rende : KEE GBKP No. 3 : 1, 5
 1. Puji Dibata e, Raja Mbelin Si Mulia
Kita Kerina Erjimpuh ertoto ku IA
Pulunglah Min, Rende Ersurak me kin
Krina me Kam Manusia.
 5. Puji Dibata tendingku peb'linken gelarNa
Ibas kuasa Dibata la lita nge sibarna
Si erkesah pulung sorana gelah
Puji gelar Tuhan, Amin.
2. Ertoto
3. Rende : KEE GBKP No. 209 : 1
 1. Perpulungen ersadalah ngikutken pedahNa
Bas kiniteken tetaplah, man Tuhan Dibata
Bas si mehuli ayaklah, sisampat- sampaten
Bage kap pedah Dibata, Sikeleng-kelengen.
Renungen : Perbahanen Rasul- Rasul 1 : 21-26
Tema : "Ngkuhi Kiniersadaan"

Lit sada pepatah singatakenca "bersatu kita teguh, bercerai kita runtuh". Arah pepatah enda ngatakenca maka kiniersadaan perlu tetap ilakoken bas kegeluhenta gelah tetap sialoken kemalemen ate bas kegeluhenta. Teks renungenta bas paksa enda nuriken kerna uga Matias ipilih guna nggantiken Judas. Petrus ras Johanes, Jakup ras Andreas, Pilipus ra Tomas, Bartolomeus ras Matius, Jakup anak Alpeus, Simon pejuang ras Judas anak Jakup tutus atena kerina ertoto, ikut pe diberu, bage pe Maria anak nande Jesus ras senina- senina Jesus (ayat 13,14). Ibas pemilihan Judas Iskariot enda lit syarat eme si rusur ngikutken Jesus asum IA erdalan- dalam ras kita (ayat 21). Eme mulai ibas paksa Johanes ndilo kalak iperidiken seh ku paksa Jesus iangkat i tengah-tengahta nari ku surga (ayat 22). Arah pertoton ajar- ajar Jesus tupung sie maka kedungenna Matias ipilih guna nggantiken Judas Iskariot.

Teridah arah bahan renungenta enda maka ajar- ajar Jesus pulung ras ertoto guna nggantiken kai si enggo bene (Judas Iskariot). Arah sie pe ngatakenca gelah ngawan ni perpulungen arus tutus pulung ras ertoto guna ngkuhi si bene bas paksa enda.



4. Rende : KEE GBKP No. 204 : 1, 2

1. Kata ni Dibata, seh kel e perluna bas geluh enda.
Ogelah pustaka, je IA ngerana man banta krina.
Gegeh i bas geluhku, KataNdu situhu-tuhu ras pasu- pasuNdu.
2. Kata ni Dibata, e jadi senjata bas geluh enda.
Lawenlah musuhta, La arah gegehta ipemenangNa.
Tetap kal ukur kami, La lit keiaren nari, Tuhan si nampati.

5. Pertoton Syafaat :

1. Gelah ngawan ni perpulungen GBKP tetap tutus pulung ras ertoto guna ngkuhi sibene.
2. GBKP ibas pelayanena bas tahun 2017 enda.
3. Siturah bas jabu.
4. Pertoton Tuhan.



KEBAKTIN PRA PEKAN DOA GBKP (i Rumah)

WARI/BERNGI III, SABTU 27 MEI 2017

- ~ **Simabasa banci bapa nta h pe nande**
- ~ **Adi sekalak oge saja kerina bahan renungen enda**

Bapa / Nande : I bas jabunta enda nari, mari si puji dingin si sembah Tuhan, si tetap ermediate ku bas kegeluhenta ras si encukupken kerina keperluanlunta. Mari ras kita rende KEE GBKP No 348 :1 si endeken kari telu kali

*Ersembah perlu i bas doni enda e desken bingke bas kegeluhenta
Ersembah em pedah kata Dibata pehaga Tuhan bas kegeluhenta*

Bapa / Nande : Ersuraklah man Tuhan o pertibi kerina

Kerina : Nembahlah man Tuhan alu ukur meriah, dahilah ku adep-adepenNa alu rende meriah

Bapa / Nande : Ola lupa maka Tuhan kap Dibata

Kerina : Ia si nepa kita, emaka sikerajangenNa nge kita, kita kap bangsaNa, kita kap rarasenNa

Bapa / Nande : Bengketlah ku pintu gerbangNa alu ende-enden pengatakan bujur

Kerina : Ku bas kesainNa alu puji-pujin, katakenlah bujur man baNa dingin pujilah IA

Bapa / Nande : sebab Tuhan mehuli kap dingin tetap IA erkeleng ate

Kerina : IA setia, tetap rasa lalap

Bapa / Nande : Si sembah dage Tuhan si tetap ncidahkan kesetianNa man banta KEE No. 348 : 1

*Ersembah perlu i bas doni enda e desken bingke bas kegeluhenta
Ersembah em pedah kata Dibata pehaga Tuhan bas kegeluhenta*

Bapa / Nande : (Renungen : Perbahanen Rasul-rasul 2:1-11)

a. Ertoto ope renungen, b. Renungen, c. Ertoto kenca renungen)

Pulunglah Min

*Asum wari raya Pentakosta, pulung kerina kalak si tek man Tuhan
Jesu I bas sada ingan (ay.1).*

Kai dalan-dalanna maka kerina kalak si tek e pulung i bas sada ingan ?



Ope Jesus nangkih ku surga, erpadan IA man ajar-ajarNa, nina :
“Tapi ialokenndu pagi gegeh asum Kesah Si Badia seh man bandu. Janah kam me pagi naksiken kerna Aku man kalak si deban, i Jerusalem, i daerah Judea ras Samaria, seh ku belang-belang doni enda”. kencana ibelaskenNa e, Jesus nangkih ku surga.

Alu dem pengarapen, kerina ajar-ajar Jesus ras kalak si tek man Jesus paksa si e pulung ras-ras i Jerusalem nimai padan si enggo ibelasken Tuhan Jesus e. I bas kepulungen ajar-ajar e ras-ras ia ertoto, lenga bo iangka ajar-ajar kai kari si jadi, tapi ersada ukur ia kerina lako nalangi pusuh perukurena, gelah kai gia si jadi tetap ersada ia ndalanaisa. Tuhu lit kearun ate i bas ajar-ajar, tersungkun-sungkun nge kerina i bas pusuhna, kai nge kari si jadi, ras penungkunen sibagenda rupana labo saja i bas ajar-ajar tapi pe i bas kerina kalak si tek man Jesus. Emaka kerina ia muat bagin ertoto radu ras ajar-ajar, gelah ajar-ajar Jesus e pe tetap ukurna, tetap ersada arih ras ersada pengarapenna, maka kai pe si ibereken Jesus e pasti guna kiniulin. I bas pertoton ajar-ajar radu ras kalak si tek paksa sie turah sada pengakun maka kerina ajr-ajar e seri I lebe-lebe Dibata, la lit ije si ganjang teruken, ajar-ajar mulai ngelepaskan biak ke ‘aku’na (keegoisan).

Tupung ajar-ajar e kerina ertoto, seh me padan si enggo ibelasken ndube, terbegi me sora ilangit nari bagi sora erdeso, sora ndai ndemi rumah ingan pulung ajar-ajar e. Emaka nusur dilah-dilah api encinepi kerina ajar-ajar. Sora si erdeso, dilah-dilah api eme sada ‘tanda’ si nuriken nusurna Kesah Si Badia. IA erkuasa, ergegehkal, si mereken terang ras perdamen, engkernepen si jahat ras mbersihkensa. Kesah Si Badia si nusur desken dilah-dilah api e ertina kerina ajar-ajar arus ngerana, ersaksi kerna Jesus si enggo mate, keke ras nangkih ku Surga, Jesus e me Juruselamat doni enda. Kesah Si Badia eme si mereken kengasupen man ajar-ajar lako ersaksi. Kesah Si Badia epe nuriken maka Tuhan Jesus la pernah nadingken apai ka ngelupakan ajar-ajar, tapi tetap mereken keriahen ras semangat lako pulung ras erberita. Tugas ersaksi enda labo saja man ajar-ajar, tapi pe man kerina kalak si tek si naksiken nusurna Kesah Si Badia. Kerina kalak si tek e igelari perpulungen, la pe iatanken lako erberita kerna kuasa Kesah Si Badia.



Katawari kin nusurna Kesah Si Badia e ? Tupung ajar-ajar ras perpulungen pulung ras-ras dengen ertoto. Pulung ras ertoto enda kepe mbelin gunana man perpulungen Tuhan. Dua - telu kalak gia si pulung i bas gelar Tuhan, Tuhan enggo lit i tengah-tengahna arah Kesah si Badia. Si igelari perpulungen e eme bapa nande ras anak-anak benaken kin i bas jabu nari. Perlu kal bapa, nande ras anak-anak rusur pulung dengen ertoto, ercakup-cakup kerna kata Dibata. Tupung kita pulung ras ertoto, ije me nusur Kesah Si Badia ku bas jabu ras pusuh se isi jabu. Kesah Si Badai e me si erbahansa kita banci siangkan, lit perdamen, ndauh i bas ukur serap-serap, sebab Kesah Si Badia e empedauh kerina perukuren si jahat janah mbersihkan kita i bas perbahanen si la mehuli.

Kenca i bas jabu si tambahi me temanta lako ercakup-cakup kerna kata Dibata, naksiken kuasa Dibata si enggo sialoken kita i bas jabunta nari, emaka bengket me kita ku bas perpulungen-perpulungen Tuhan, subuk ku gereja bagepe perpulungen jabu-jabu, PA ras si debanna. Semangatta reh ku perpulungen e eme penjemba Kesah Si Badia. Amin.

Bapa / Nande : Kenca sibegi Kata Dibata enda ndai, si aloi dage alu ngendeken :O Kesah Si Badia e (KEE 245:1) si endeken kari 3x

***O Kesah Si Badia, pegara min apiNdu
Bas pusuh kami krina, si nggo dat pendiloNdu.***

Topik Doa Syafaat.

1. Gelah Ngawan GBKP iteruh kuasa kesah Si Badia.
2. Gelah Serayan GBKP mengandalken kuasa Si Badia.
3. Gelah perpulungen merincuh pulung muji Tuhan ras megiken kataNa.



KEBAKTIN PEKAN DOA GBKP (I PERPULUNGEN) WARI/BERNGI I, MINGGU 28 MEI 2017

I. PERSIKAPEN

1. Nikapken simuat bagin ibas ibadah si mengalir rikut kerina perlengkapen kebaktin
2. Kata Penaruh
Mejuah-juah sibenaken pekan doa wari si pemena enda. Kenca ersada kita ertoto ibas jabuta maka si peteguhi persadanta ibas perpulungenta radu ras senina dingen turangta. Ija tangkas maka pertoton kalak sitek ergegeh kal.

Emaka ninta man temanta: *'Mejuah-juah teman mari kita nggeluh alu tetap ertoto'* ialoi si sada nari *'Payo, pertoton eme gegehta'* '(alu si salamen kita kawes kemuhenta). Pekan doata tahun enda tole mpebagesi penandaita kerna Dibata si sembah kita. Gelah ibas pertotonta tep-tep paksa, reh payona sitandai Dibata si jadi inganta nuri-nuri. Dibata si ngaloi pingko-pingkota e. Emaka man baNa kita erpengendes arah pertotonta:.....

3. Ertoto
4. Rende KEE No 217:1,2 (naruhkan simaba kebaktian)
 1. Meriahlah ukurta mujikenca, Dibata Raja mbelin si mulia
Peblinken min gelarNa Si Badia, Ban IA ngerajaisa sinasana
Reff : Maka bujur nge Dibata man pujin
Nai-nai nari genduari seh pagin
Ban tandaina krina kita si suin sembah IA me madin
 2. Dagena mari pujilah Dibata, Si inget min kerina pemereNa
'Lah tetap ras megegeh pe tendita, Mehuli me jadina k'rajang jelma
Reff...

1. VOTUM, SALAM, INVOCATIO

- L : Kebaktin enda ibenaken ibas gelar Dibata si njadikan doni ras isina kerina
- P : Pindo gegeh ras pasu-pasuNa ibrekenNa man banta
(iendeken bagin KEE No. 320)
- L : Ibas gelar Jesus Kristus si mpetangkas keleng ate Dibata ibas doni enda alu bage itandai manusia Dibata e
- P : Pindo gegeh ras pasu-pasuNa ibrekenNa man banta
(iendeken bagin KEE No. 320)
- L : Ibas gelar Kesah si Badia si nampati manusia nandai Dibata alu payo
- P : Pindo gegeh ras pasu-pasuNa ibrekenNa man banta
(iendeken bagin KEE No. 320)



L : Perkuah ate ras dame i bas Dibata Bapa, AnakNa Jesus Kristus ras kerembaken Kesah si Badia, ras kita (kam) kerina gelah. Amin.

P : Amin..... Amin..... Amin. (iendeken)

L : Awang-awang ndai igelari Dibata langit emaka ben me wari, jenari siang ka-eme wari sipeduaken (Kejadin 1:8)

Sipuji Dibata si enggo ncidahkan diriNa man banta erpalasken KEE No. 321: 1,3

1. Sisembahlah min Tuhan si mbelin
Endekenlah min ende-enden pujin
Tuhan Dibatanta ingan cicio
Sembahlah IA ola kita menggo

2. Seh kal ulina penjayamenNdu
Terang ras gelap e nuduhkenca
Udan ras lego krina kap ndatkenca
Kuasa keklengenNa mbelin tuhu

2. PUJI-PUJIN MAN DIBATA (Masmur 99:4-7)

L : O Tuhan Kam kap Raja si mbisa, ngena ateNdu kebenaran

P : Enggo ipajekkenNdu kinibujuren.Kinibujuren ras kebenaran idalankennNdu i Israel.

L : Pujilah Tuhan, Dibatanta, nembah erjimpulah

P : ladep-adepen kursi kinirajanNa, Badia kap IA

Mamre : Musa ras Harun kap imamNa

Moria : Samuel e me kap kalak si tutus ertoto man baNa

P : Erlebuch ia man baNa janah idengkenNa pertotonna

L : Ibas binangun embun nari ngerana IA man kalak kerina

P : Ipatuhina kerina perintah-perintahNa

L : Sipuji Tuhan Dibata Raja si mbisa ibas kegeluhen doni enda alu ngendeken KEE No. . 368:1-3

1. Sipuji Tuhan Dibatanta, kataken bujur baNa
Sabab IA simerekenca, pasu-pasu man banta

Reff : Mbelin ras mulia kekelengen Tuhan, ibas doni enda
Ajari o Tuhan, kami krina anakNdu
Naksiken kerina perbahanNdu

2. Geluh kami meriah tuhu, krina si krajangenNdu
Sabab kalak si nembah banNdu, datken pasu-pasuNdu,
Reff.....

3. Inget kami padan Tuhan, bas kegeluhen kami
Kam si mereken kegeluhen, mpetetap ukur kami
Reff....



3. NANDAI DIRI IADEPEN DIBATA

- L : O Tuhan Dibata, enda kami anak-anakNdu si tetap ersembah man baNdu. Ibas kerina kecibal geluh kami, erlebuh man baNdu.
- P : O Tuhan Dibata, megati kal la itandai kami diri kami iadepenNdu erkiteken kurang penandai kami Kam Dibata kami.
- L : Kam Dibata kami, man bandu kami ertoto, man bandu kami nuri-nuri ibas kerina kecibal kegeluhen kami
- P : Kam Dibata si erkuasa, tapi maun jadi ate kami ngatur Kam o Tuhan arah pertoton kami, alami kami o Tuhan...
- P : (Rende KEE No. 377:1)
Kuakuken me dosangku ilebe Tuhan, megati aku lalar bas kegeluhenku
Keleng ateNdu pengarapenku, iteruh perkuahNdu malem me pusuhku
Keleng ateNdu pengarapenku, iteruh perkuahNdu malem me pusuhku
- L : Mari sitandai dirinta selaku tinepa Dibata. Dibata me ngaturken kerina kecibal kegeluhen manusia idoni enda
- P : Payo o Tuhan, ngaku kal kami maka Kam si nepa kami, Kam Dibata si mereken kegeluhen nandangi kami ras isi jabu kami.
- P : (Rende KEE No.377:2)
Erlebuh aku baNdu o Yesus Tuhanku
Alemi min o Bapa salah ras lepakku
Keleng ateNdu pengarapenku
Tedeh 'teku ngidah belinna perkuahNdu
Keleng ateNdu pengarapenku
Tedeh 'teku ngidah belinna perkuahNdu
- L : Dibata si Badia, Dibata si erkuasa, Dibata si tetap rasa lalap seh rasa lalap, Dibata si reh ku doni enda ibas Jesus Kristus
- P : Man banNdu kami nembah, ku Kam kami erpengendes, Kam si ngaturken kerina geluh idoni enda, Kam teman kami.
- L : Mari sipuji Dibata si enggo mpetandaken diriNa man banta arah KEE No 423:1, 3
1. Kam nebusi aku Tuhan, Kam si mpeteneng tendingku
Tendi si ndube tertaban, teguNdu ku adepenNdu
Reff : Malem kal ateku Bapa, ban keleng ateNdu
Kupuji gelarNdu Bapa, mulia gelarNdu
TeguNdulah aku Tuhan, ibas pusuhku Kam ringan
PetetapNdu aku Tuhan, lah dosa talu me kuban
 3. Kam ngaloken aku Tuhan, Kam simpekena ukurku
Ukur si nimbak Kam Tuhan, alokenNdu ibas tanNdu
Reff....

4. RENUNGEN

Teks : Keluaren 3:5-15

Tema : Kutandai Dibata Si Kusembah

Ise kin Dibata si ku sembah? Adi nai orang tua ntah nini-nininta nandai Dibata si isembahna arah erbage si lit idoni enda, emaka ia nembah ku batang kayu galang, lau belin ntah pe ku ingan-ingan si iakapna lit keramatna. Man nini-ninina siakapna lit kuasana nandangi geluhna, emaka ku je me ia mereken sembah-sembahen. Enda ngatakenca maka manusia tek maka lit kuasa dengen gegeh sideban ngaturken kegeluhenna, eme si iakapna ikut mpengaruhu gegeh dengen geluhna.

Kalak Israel si enggo ndekah tading i Mesir, ngenanami kiniseran erkiteken itindas pemerintah. Ibas situasi si bage rupana, Dibata reh nampati bangsa e, emaka ipilihNa Musa jadi suruh-suruhanNa nehken kataNa man bangsa enda.

Musa sangana mpermakani biri-birina ideleng Sinai, iidahna rambah duri gara tapi la meseng. Dibata ngelebu ia dengen ialoina. Isuruh Dibata ia reh alu nangtangi selopna sabab inganna tedis e badia. Ipetandaken Dibata diriNa man Musa maka IA eme Dibata nini-ninina, leluhur Israel: Abraham, Isak ras Jakub (ayat 6). Enda me leluhur Israel, bangsa enda nginget teluna leluhurna si kedungenna jadi sada bangsa si mbelin. Aminna bangsa enda enggo ndekah i Mesir tapi turi-turin kerna Abraham, Ishak ras Jakub bagepe Dibata si enggo erbahan ia jadi sada bangsa si mbelin tetap iturikenna ku anak kempuna. Jadi, aminna pe bangsa enda lanai nandai Dibata Jahwe tapi ietehna turi-turinna. Enda sada pintu masuk si banci ipake Musa guna nuriken Dibata si ersura-sura maba mulih bangsa enda ku Kanaan.

Situasi Israel paksa e, enggo terpuruk, serko erlebu man Dibata sabab mesui kal atena ringan i Mesir. Itindasna bangsa e, jadi buruh kasar, tambah ka kebiaren raja Mesir munuhi anak dilaki kalak Israel, erkiteken kebiarenna nandangi bangsa enda.

Ituriken maka kerina kecibal bangsa enda enggo ieteh Dibata:

- Enggo Ku idah serana akap bangsaku, Dibata ngidah ras meteh kerina si jadi ibas doni tinepaNa enda, la lit si lepas ibas kuasaNa. La terligen mata Dibata natap si jadi itengah kegeluhen bangsa enda (Allah maha melihat). La lit siterligen ibas Dibata, nai nari seh asa genduari, ibas kegeluhenta tangkas iidahNa.
- Enggo Ku begi sorana nderkuh gelah ipulahi ibas mandur budak nari. Tek kal bangsa enda, maka ia tetap erlebu man Dibata nini-ninina. Si banci mulahi bangsa enda, ertina gegehen kuasa Dibata asangkan dibata kalak Mesir e "Allah maha mendengar". IA tetap ndengkehken sorata erlebu (band. Jesaya 59:1)
- Enggo Ku eteh kerina kiniseranna, kerina ieteh Dibata, suita, senangta, paksa kita ngelabuh ras erbage kesenangan seh man banta, kerina ieteh Dibata "Allah maha mengetahui", la lit la ietehna kerna kegeluhenta, ietehna suita, aru ateta.



-
- Emaka Ku taruhkan, ibas kerina kecibal bangsa enda, maka Dibata muat inisiatif, milih Musa dingen mereken tugas man bana. Dibata me sinaruhkan ia mulihi sue ras padanNa man Abraham, Ishak ras Jakub. Bage pe Dibata naruhkan geluhta ibas doni enda seh paksana (Masmur 121:8)

Dibata milih ras ndilo Musa alu sada tugas eme maba bangsa Israel ndarat i Mesir nari (ayat 10). Dibata ngajari Musa alu strategi : ndahi raja, mindo gelah iberena bangsa enda ndarat i Mesir nari. Enda labo dahin si menukah, pasti ibere raja, amin bage pe kepeken Dibata enggo nikapken kai si arus jadi dikune itulak raja. Arah sienda nuriken maka Dibata enggo ngerancang kegeluhen manusia (Musa ras Israel bagepe Mesir) ibas paksa si reh. Arah erbage kejadiin si nandangi jadi ibas proses mulahi Israel i Mesir nari icidahken Dibata kuasaNa arah erbage-bage kejadiin. Tole arah enda bangsa enda Dibata si isembah nini-ninina nai nari. Dibata si erkuasa nandangi doni tinepaNa termasuk pe man Raja Mesir si labo nembah man baNa. Arah perbahanenNa e Israel nandai Dibata reh payoNa.

Musa perlu kepastin, sope ia mpetandaken Dibata si nuruh ia e man kalak Israel maka ia jine arus nandai dingen meteh cara mpesehsa man bangsa e. Sabab banci saja enda isungkun bangsa e, ija pasa e ia kerina ringan i Mesir, i Mesir la sitik gelar dibata-dibata bangsa e. Tentuna enda penting kal man Musa. Dibata nuriken gelarna nina 'Aku tetap Aku', siertina maka Dibata eme sada Pribadi, si erkuasa, awal mula kerinana, Dibata si lit dingen njadikan kerinana silit idoni enda, si enggo erbahan perpadanen ras Abraham, Ishak ras Jakub. Ibas invocatio pe ituriken kuga Dibata nepa doni ras kerina isina alu mehuli, ia erbahan gelar kerina silit idoni enda. Ise si erbahan gelar Dibata? Emaka IA Dibata, la pernah berubah nai nari seh rasa lalap.

Kuga ibas kegeluhenta jaman sigenduari enda, me enggo payo kin sitandai Dibata si sembah kita e? Payo, Dibata mpetandaken diriNa man banta alu caraNa. Arah IA njadikan doni ras isina sitandai maka lit Dibata si erkuasa nandangi kerinana. Arah Jesus Kristus si reh ku doni enda, ipetandaken Anak e diriNa ku doni enda.

Tentuna kerna sienda kerina lit nge kalak si erberita, si petandaken Dibata e man banta. Banci saja arah orangtuanta si lebe jadi Kristen, arah Guru KA/KR, Pendeta ntah pe teman-temanta. Ibas kerina e Dibata erdahin mpetangkas diriNa man kalak si nembah IA alu erbage cara ras perbahanenNa si mbelin. Arah erbage kejadiin si jadi ibas kegeluhenta, kitik ntah mbelin la lit si puluh ibas kuasa Dibata.

Manusia labo ngasup nandai Dibata alu carana tapi Dibata mpetandaken dirina alu caraNa jine man manusia alu bage banci itandai manusia Dibata alu payo. Bagi cara Dibata mpetandaken dirina man Musa.

Selaku kalak Kristen si ersembah man Dibata arus sitandai Dibata si sembah kita e, seh maka malem ateta erDibataken IA. La kita ragu man baNa, tetap kal ukurta



ngikutken IA. Ngasup kita mpetandakena man kalak sideban, sabab dikune la jelas man banta, pasti kita pe erbera-bera ngikutken IA.
Selamat mengikut Dibata si tandai kita.

5. PENGAKUN KINITEKEN

(Perp. Tedis)

6. PERSEMBAHEN

(Perp. Kundul)

L : Kata Dibata si jadi palas i bas kita ngataken bujur eme ibas Masmur 56:13 nina:

P : O Dibata kupersembahkan baNdu kerina si enggo ku padanken.

L : Persembahen pengataken bujur ku persembahkan banNdu.

Tupung kita mpepulung persembahenta, sipuji Tuhan ibas KEE No. 471

Ermengkah ukurku, ras ngataken bujur Tuhan
Kelengi min aku, Kam empu geluhku
Enda ngenca Tuhan, persembahenku
Kerina geluhku, kesah ras kulangku
La kap lit bas aku, erta kebayaken
Si cukup meherga, lah ku persembahkan
Sada ngenca Tuhan, lit pemindonku
Aloken min Tuhan, persembahenku
Pakeken geluhku, jadi perkakasNdu
Segedang geluhku.

7. PERTOTON PERSEMBAHEN RAS SYAFAAT

L : O Tuhan Dibata si enggo mpetandaken diriNdu man kami, reh kami ertoto man baNdu o Dibata kami.

P : *(Ertoto ibas pusuh kerna dirinta ras kinitekenta..... 2 menit)*

L : O Tuhan Dibata Kam enggo mpersadaken kami ibas jabu-jabu kami, ertoto kami man baNdu

P : *(Ertoto ibas pusuh kerna jabuta secara pribadi 2 menit)*

L : Tek kami Kam Dibata si enggo milih kami jadi bagin ibas rencana si mbelin ibas doni enda

P : *(Ertoto ibas pusuh gelah ngasup muat bagin ndalanken rencana Tuhan ibas erbage si mehuli 2 menit)*

L : Ibas Kam nari o Tuhan si reh ras lit bas kami, ngataken bujur kami man baNdu arah persembahen kami enda

P : *(Notoken persembahen si enggo pepulung 2 menit)*

L : Kam Dibata si isembah kami, ibas Pekan doa enda kami ertoto kerna perpulungenNdu *(nerusken guna notoken siturah ibas perpulungen)*.
Amin



-
- L : Mari radu ras kita rende KEE No. 176:1
1. Ibas toto ku belasken, seh man baNdu Tuhanku,
Ajar aku lah ngaloken, si mehuli akapNdu
Pertoton ku bagi Jesus, sanga bas kinisranNa
Labo peratenku Bapa, peratenNdu jadilah

8. TEKAD RAS PENGUTUSEN (Perp. tedis)

- L : Dibata enggo mpetandaken diriNa man banta arah IA nepa doni ras isina rikut ras erbage perbahanenNa arah kerehen Jesus Kristus ku doni enda.
- P : Itandai kami Kam Dibata si isembah kami, man bandu kami tetap erpengendes
- L : Tetap kami ngandalken Kam ibas geluh kami, tetap kami mindo ras erpengendes man banNdu o Tuhan
- P : Kam ingan kami nuri-nuri o Dibata kami
- L : Mari si puji Dibata si sembah kita segedang kegeluhenta arah KEE No. 188:1,4
- L+P : 1. O Dibata Kam temanku, lalap bas geluhku e
ApuliNdu kap pusuhku, sampatiNdu aku pe
Reff : Tetap kal ukurku e, Kam Dibata temanku
Sedekah geluhku e
4. O Dibata temanku, tentu aku la bene
Lalap iteguNdu tanku, gelah ola celus pe
Reff : ...
- L : Mari radu ras kita melasken pertoton si enggo iajari Tuhan Jesus man banta sekalak-sekalak. Ninta radu ras ertoto: O Bapa kami.....
- L : Bengketi kegeluhenndu alu mabai jabu tetap ersada ibas kerina simehuli sabab paguh kap palasna ibas Jesus Kristus kepala rumah tangga: IpengasupNa kita (kam) ras isi jabuta (ndu) alu pasu-pasuNa. Alokenlah pasu-pasu idur IA nari:
Dibata Bapa ras Tuhanta Jesus Kristus mereken kemalemen ate,kekelengen ras kiniteken man banta (ndu) gelah. Lias ate Dibata rembak ras kerina kalak si erkeleng ate man Jesus Kristus alu keleng ate si la erkeri-kerin". Amin. (Epesus 6:23-24).
- P : Amin.....Amin..... Amin. (iendeken)

Cataten :

1. Tedis ras kundul tupung kebaktin nehen situasi ingan kebaktin
2. Sijaga kebadian ibas kebaktin.



KEBAKTIN PEKAN DOA GBKP (I PERPULUNGEN) WARI/BERNGI II, SENIN 29 MEI 2017

I. Persikapan.

- a) Nikapken kerina alat-alat kebaktin.
- b) Ngaturken siman totonken bas doa safaat.
- c) Erkiteken enda ibadah kontemplatif, emaka perdalanen ibadah mengalir secara otomatis. Janah perlu iaturken perkundulta alu mehuli (asa bancina ula sidegesen)
- d) Usahaken lit musik, organ tah pe gitar.

II. Kebaktin.

1. Kata Penaruh.

-----*paksa teneng iiringi musik instrumental KEE No. 244*-----

Mejuah-juah man banta kerina turang ras senina ibas kekelengen Tuhanta Jesus Kritus. Si kataken bujur man Dibata si enggo mereken kesempatan man banta pulung ibas Pekan Kebaktin Doanta wari/berngi enda. Enggo tangkas si gejep maka toto eme gegehta manusia. Si mpengasup kita ngalaken kerina situasi si terjadi ibas geluhta, subuk situasi si bagi ukurta ntahpe situasi si la bagi ukurta. Si perlu situduhken eme ketutusenta ertoto bagepe kepatuhenta nandangi sura-sura Dibata. **Emaka si petenenglah pusuhta, si bengketi kebaktinta enda alu radu ras kita erpengendes man Tuhan arah pertotonta.....**

-----*paksa teneng iiringi musik instrumental KEE No. 244*-----

Kekelengen Tuhan, mari dage ras kita rende ibas **KEE No. 244:1 (iulih-ulih 2x)**
(Ngendesken Perlengkapan Man Liturgis)

1. Nusur min o Kesah Tuhan, bengket ku pusuhku e
Maka kata si nisuan, turah ras erbuah pe
Kam ibas Dibata nari, kep-keplah ukurku min
Pasu-pasu pendahin, maka aku genduari
Ndaram tuah si tetap, alu ate si telap

2. Votum + Salam.

L : Ibas gelar Dibata Bapa si mada kerina sinasa lit, ibas gelar Jesus Kristus si jadi ulu pertotonta, ras ibas gelar Kesah si Badia si mabai kita ertoto ibas geluhta. Perkuah ate ibas Dibata Bapa, ibas anakNa Yesus Kristus ras ibas gelar Kesah si Badia. Amin.

P : Amin.....Amin.....Amin.



3. Invocatio.

L : *“Paksa sie, lawes Jesus ku datas sada uruk-uruk; ije la ertoto man Dibata seh terang wari.”* (Lukas 6:12)

Turang ras senina, Jesus enggo nuduhkan ras naksiken man banta maka la tetap ertoto ibas geluhNa man Dibata segelah kita pe tetap ngusih perbahanenNa e. Emaka si puji Tuhan alu ngendeken: **KEE No. 176:1 (iulih-ulih 3x)**

1. Ibas toto ku belasken, seh man baNdu Tuhanku
Ajar aku lah ngaloken, si mehuli akapNdu
Pertotonku bagi Jesus, sanga bas kiniseranNa
Labo peratenku Bapa, peratenNdu jadilah

4. Perbahanen Dibata man manusia.

-----paksa teneng iiringi musik instrumental KEE No. 359-----

L : Kekelengen Tuhan, mari dage si renungken perbahanen Dibata si enggo ilakokenNa man banta manusia seh maka tetap pe ukurta muji dengen nembah gelarNa si Badia e.....

-----Perpulangan ertoto, iiringi musik instrumental KEE No. 359-----

L : Kekelengen Tuhan, nginget perbahanen Dibata si dem alu keleng ate man banta emaka mari sikataken bujur man Dibata alu radu ras kita rende arah ende-endenta **KEE No. 359:1 (iulih-ulih 3x)**

*Kerina anak Tuhan, pujilah IA
Kerina anak Tuhan, pujilah gelarNa
Kerina anak Tuhan, pujilah IA
Kerina bangsa-bangsa, pujilah gelarNa*

5. Kinata perbahanen manusia.

L : Kekelengen Tuhan, si tandai nge ise kita ilebe-lebe Dibata? Si inget nge dosa ras kelepaken silakoken kita ilebe-lebe Dibata? Emaka ibereken kesempatan guna notoken kerina dosa ras kelepaken silakoken kita ibas tengah-tengah geluhta.....

-----Ngakuken kerna dosa ras kelepaken silakoken kita, iiringi musik instrumental KEE No. 76-----

L : Kekelengen Tuhan, si sadari nge maka kita megati lanai ertoto ibas ndalanken pendilo Dibata e ibas pusuhta?

-----Notoken dirinta si rusur lanai ertoto ibas ndalanken pendilo Dibata e bas geluhta, iiringi musik instrumental KEE No. 76-----

L : Kekelengen Tuhan, megati kal gegeh ras ukurta nge sipakeken ibas nehken keleng ate Dibata e man kerina jelma. Lanai si pindo pe gegeh ibas Dibata nari.



-----Notoken dirinta si rusur ngandalken gegeh ras ukurta ibas ndahiken dahin
Dibata, iiringi musik instrumental KEE No 76-----

L : Kekelengen Tuhan, alu pusuh si getem dengen dem pengakun dosa, marilah si akuken salah ras lepakta dengen si endesken dirinta man Tuhan alu ngendeken:

KEE No. 76 :1 (ulih-ulih 3x)

*KulebeNdu o Dibatangku, Aku nembah erjimpuh pe
Dengehkenlah min totonku, Nen iluhku mambur e*

6. Berita kerna kekelengen Dibata man manusia.

L : Turang ras senia kekelengen Tuhanta Jesus Kristus, alu keleng ateNa Dibata tetap ngaloken kalak si erkadiola ibas kerina kesalahen ras kelepakenna. Sabap nina Dibata: *“Kalak si ngkelengi Aku, Kukelini kap, dengen kalak si ngakui Aku kap Tuhan Kukawali kap ia. Adi erlebuh ia man bangKu kualoi me ia. Tupung ia ibas kiniseran, Aku kap ras ia; Aku kap simulahi ia dengen si permuliakenca.”* (Msm. 91:14-15).

Malem kal ateta, sabap enggo ipetangkas Dibata keleng ateNa man banta manusia. Emaka si puji Dibatanta alu ngendeken: **KEE No. 357:1 (ulih-ulih 4x)**

*Ula kam mbiar, ula kam gentar
Ibas Tuhanta, labo lit kurang
Ula kam mbiar, ula kam gentar
Tuhan si njamini*

7. Renungen (ertoto sope ras kenca renungen).

Invocatio : *“Paksa sie, lawes Jesus ku datas sada uruk-uruk; ije la ertoto man Dibata seh terang wari.”* (Lukas 6:12)

Renungen : 1 Samuel 1:21-28

Tema : **“TUTUS RAS PATUH”**

Setiap manusia pernah erpadan bas tengah-tengah geluhna. Perpadanen e banci saja reh erkiteken enggo turah kesadaran diri sendiri janah banci ka erkiteken lit persinget man banta. Si jelas, tentu perpadanen e biasana eme sura-sura gelahna min terjadi sada pembaharuan (perobahen) ibas tengah-tengah geluhna. Perobahen e tentu ku bas cara rukur, cara ngerana bagepe ras perbahanen si ilakoken manusia. Bage me kepe perpadanen e pentingna ibas kegeluhen manusia, seh maka biasana kalak si enggo ibahanna perpadanenna tetap kal ia ncikep dengen ndalanken padan si ibelaskenna e ibas geluhna.

Enda me si idah kita ibas kegeluhen Elkana ras Hanna, maka lit kepe kiniersadan jabuna ibas erpadan man Dibata. Aminna gia perpadanen e



ibelasken Hanna secara sepihak janah biakna pe biak si mehuli ka nge, emaka teridah nge kiniersadan Elkana ras Hanna maka lanai bo ia sitogan-toganen kerna perpadanen e. Minter ituduhkenna maka ia tetap nge ersada. Tentu selaku jabu perlu ka nge si idah maka kiniersadan jabu Elkana ras Hanna jadi usihen ka man banta. Terlebih-lebih ibas sura-sura si mehuli dengen si ngena ate Dibata. Arus si tuduhkan kiniersadanta erpadan man Dibata ibas tengah-tengah jabu.

Perpadanen si ibelasken Elkana ras Hanna e jadi erkiteken enggo tangkas penandaina kerna ise kin Dibata e. Enggo ietehna maka Dibata nge ingan erpengendes ras ernalem. Alu bage, arah penandaina e me banci si idah maka tutus dengen tulus nge ia ersembah man Dibata ibas geluhna. Sie ibuktikenna arah perdalanen geluhna, maka ibas perbeben ras sura-surana e iendeskenna kal kerina man Dibata. Tentu bage ka me kita selaku kalak si erkiniteken, maka perlu situduhkan ketutusan ras ketulusenta ersembah man Dibata ibas kerina dampar kegeluhen si dalani kita. Subuk ibas keriahen bagepe ibas perbeben si nihadapi kita. Sebab ibas Dibata me banci si aloken kerina serpang luah bas kegeluhenta. Emaka lanai bo kita mbiar ngalaken situasi si kugapa pe ibas geluhta. Sebab enggo tangkas man banta maka si aloken me penampat ibas Tuhan nari si mpegegehi kita ibas geluhta.

Perukuren si bage me si njemba Elkana ras Hanna alu dem kiniteken nehi perpadanenna man Dibata. Sebab ibas ia mindo pemere Dibata si mbelin eme anak kutengah-tengah jabuna, enggo ipadankenna maka pemere Dibata e pe pagi iendeskenna nge mulihi man Dibata. Bage me isi perpadanen ras pertoton si ibelasken Hanna man Dibata. Janah ibas ketutusan ras alu dem pengarapenna man Dibata e nge si erbahansa mekuah ate Dibata dengen isehi Dibata me pertoton Hanna e. Alu bage si perlu si idah maka pertoton si tulus dengen dem pengarapen man Dibata tentu ibegiken Dibata ka nge. Memang labo lit hakta selaku manusia lako memaksaken kehendak ras sura-suranta man Dibata. Tapi tek kita maka keleng ate Dibata tetap nge erdahin ibas kegeluhen kalak si erkemalangen man baNa. Alu bage ibas kita ertoto man Dibata, arus kepe alu dem kiniteken ras pengarapen segelah ibegiken Dibata pertotonta.

Ibas pertoton pe perlu ka nge si eteh, maka labo sura-suranta si jadi. Arus si inget, maka peraten Dibata nge si jadi ibas geluhta. Si enda arus si suanken ibas pusuhta, maka kai si enggo terjadi ras si nandanghi terjadi ibas geluhta, sie kerina sue ras peraten Dibata man banta. Pertotonta man Dibata arus nge



tetap mabai kita tek nandangi kerina si enggo iaturken Dibata ibas tengah-tengah geluhta. Labo kita mengandalken gegeh ras kengasupenta. Sebab kita enda manusia si terbatas ibas gegeh, terbatas ibas perukuren ras si debanna. Kalak si erpengakap ia si megegehna, maka situhuna ia la ngasup ngidah kuasa Dibata si mbelin ibas geluhna. Janah labo ka berarti kita enda bagi manusia robot. Tapi sebaliknya, maka ibereken Dibata nge gegeh ras kengasupen man banta lako ngangkai sura-sura Dibata e.

Sie me si ituduhkan Jesus man banta, ibas pengorbanen si ilakokenNa e labo kepe tujunna guna diriNa. Tapi pengorbanen e guna kiniulin ras guna kemulian Dibata. Emaka patuh dengen tetap nge ukurNa ibas mentasi kerina rancangan Tuhan ibas geluhNa. Janah alu tutus Jesus ertoto man Dibata la erngadi-ngadi. Sebab enggo ieteh Jesus maka nandangi reh me kiniseran si mbelin e man baNa. Selaku kalak si erkiniteken pe perlu kal kita ertoto la erngadi-ngadi man Dibata bagi si ilakoken Jesus. Sebab enggo si eteh maka bas toto e ngenca gegehta manusia. Arah toto ka nge kita ipengasup ndalani kerina si terjadi ibas geluhta. Bage me kepe pentingna toto e man banta, seh maka toto e merupakan “nafas kehidupen” kalak si erkiniteken. Tentu enda me si jadi tanggung jawabta selaku kalak si erkiniteken, tetap ertoto ras erpengendes man Tuhan nandangi kerina si terjadi ibas geluhta manusia. Alu bage kekelengen Tuhan, tema-nta ibas wari/berngi enda ngajuk kita gelah tutus ibas pertotonta man Dibata. La bene pengarapenta man Dibata sebab tek kita maka Dibata pasti tetap megiken pertoton kalak si setia ersembah man bana. Janah labo terjeng sie saja ngenca silakoken, arus ka pe kita patuh nandangi kerina rancangan Dibata. Arus kepe kita patuh ibas kerina sura-sura Dibata. Enda me ulih kalak si tetap ertoto man Dibata, sebab isikapken Dibata me kerina si mehuli ku bas tengah-tengah geluhna. Dibatalah si mpegegehi kita gelah tetap ertoto man baNa. Amin.

8. Pengakun Kiniteken.

Kekelengen Tuhan, enggo si begiken Kata Dibata si mpegegehi kinitekenta, emaka marilah siakuken kinitekenta raduken kerina kalak Kristen ibas kerina ingan ras kerina paksa i doni enda, **nintalah ras-ras:.....**

9. Persembahen.

Seh me paksana man banta nehken persembahen si jadi tanda pengatakan bujurta man Dibata. Kata Dibata si jadi palas man banta ibas nehken persembahenta emekap: *“Ngatakan bujur eme persembahen si pehagaken Aku, janah sipatuh ngikutken Aku tentu ku kelini”*(Msm. 50:23). Tupung si



endesken persembahen pengataken bujurta man Tuhan, radu ras kita rende
ibas: KEE No. 171:1-3

1. *Gelar Tuhan Yesus Kristus, lit seh si rasa lalap*
Gelar Yesus maba dame, keriahen si tetap
Reff: Pemasu-masunNa lit me, man k'rina manusia
IdiloNa kita k'rina, ku bas kesenangan e
2. *Gelar Yesus erkuasa, man kerina tinepa*
Ise gia mindo baNa, tentu isampatiNa
Reff: Pemasu-masunNa lit me.....
3. *Gelar Yesus ersinalsal, man si tek tergejap kal*
Gelar Yesus maba terang, nuduh dalin si senang
Reff: Pemasu-masunNa lit me.....

10. Pertoton persembahen ras safaat.

L : Kekelengen Tuhan, ibereken kesempatan man banta ibas pusuhta
sekalak-sekalak lako notoken kegeluhenta secara pribadi...

-----**ertoto ibas pusuh masing-masing, iiringi musik instrumental KEE No. 176**-----

L : Kekelengen Tuhan, ibereken kesempatan man banta ibas pusuhta
sekalak-sekalak lako ertoto kerna jabunta...

-----**ertoto ibas pusuh masing-masing, iiringi musik instrumental KEE No. 176**-----

L : Kekelengen Tuhan, ibereken kesempatan man banta ibas pusuhta
sekalak-sekalak notoken ingan pulung si sendah ras wari si pepagi...

-----**ertoto ibas pusuh masing-masing, iiringi musik instrumental KEE No. 176**-----

L : Kekelengen Tuhan, ibereken kesempatan man banta ibas pusuhta
sekalak-sekalak notoken perpulungen ras gerejanta...

-----**ertoto ibas pusuh masing-masing, iiringi musik instrumental KEE No. 176**-----

L : Kekelengen Tuhan, ibereken kesempatan man banta ibas pusuhta
sekalak-sekalak notoken bangsa ras negaranta...

-----**ertoto ibas pusuh masing-masing, iiringi musik instrumental KEE No. 176**-----

L : Kekelengen Tuhan, ibereken kesempatan man banta ibas pusuhta
sekalak-sekalak notoken persembahen si enggo ipepulung...

-----**ertoto ibas pusuh masing-masing, iiringi musik instrumental KEE No. 176**-----

L : O Tuhan Dibata Bapa kami si melias, enda me kami anak-anakNdu
Tuhan. Alu meteruk ukur kami, iendesken kami pertoton kami enda
ibas gelar Jesus Kristus Tuhan kami. Amin.

11. Perpadanen man Dibata.

(Perp. Tedis)

L : Kekelengen Tuhan, Jesus enggo nuduhkan maka la alu tutus ertoto
man Dibata dengen patuh pe ibas kerina peraten Dibata man baNa.



Emaka sitetapken pe ukurta gelah tetap tutus ertoto dingen patuh pe kita nandangi kerina peraten Dibata ibas geluhta alu rende ibas: **KEE No. 360:1 (iulih-ulih 3x)**

Ibas Tuhan aku megegeh

Tuhan me ku pujiken

Tuhan me jadi gegehku

Ibas la lit kesenangan

Ibas la lit kesenangan

12. Pertoton Tuhan.

Marilah ertoto kita bagi siniajari Tuhanta Yesus, nintalah:...

13. Pemasu-masun.

L : Kekelengen Tuhan, tutuslah ertoto dingen patuhlah man sura-sura Dibata. Saksiken dingen beritakenlah sie kerina man doni enda. Guna jadi gegehndu, alokenlah pasu-pasu idur Dibata nari: *"Ipasu-pasu janah ikawali Dibata kam, siang ayo Dibata ersinalsal ibabondu. Janah melias ate-Na ngenehen kam. Itatap Dibata ku kam, janah malem ate-Ndu ibahan-Na." Amin.*

P : *Amin.... Amin....Amin. (iendeken)*

Cataten :

1. Tedis ras kundul tupung kebaktin nehen situasi ingan kebaktin
2. Sijaga kebadian ibas kebaktin.



KEBAKTIN PEKAN DOA GBKP (I PERPULUNGEN) WARI/BERNGI III, SELASA 30 MEI 2017

I. Persikapan Bengket Ku Bas Kebaktin :

Senina ras turang ibas gelar Tuhanta Jesus, ibas gelar Runggun Gereja ikataken kami mejuah-juah man banta kerina. Malem ateta kerina pulung ibas persadan si nteguh sada ras sidebanna. Persadan si nteguh e me ulih kinitekenta man Tuhan Jesus. Ngena kal ate Tuhan di kune ersada arihta, ukurta, penggejapennta, ras sada odakta muji Tuhan bage pe njagai persadanta si enggo lit kidekah enda. Tambah si e, reh malemna ateta ras terpuji ka Dibata di kune ersada ka arihta ras penggejapenta i tengah-tengah jabu rikut ras sangkep geluhta.

Guna pebagesi pengangkanta kerna pentingna kiniersadan e, si jadi Tema Pekan Doa-nta wari/berngi enda e me: **“Kemalem Ate Ibas Persadan”**. Si pindo pengertin man Tuhan gelah siangka kai kin ras uga kin kita nggeluh ibas persadan si maba kemalemn ate. Janah, ibabo si e kerina, si pindo ka gegeh man Tuhan arah pertotonta gelah reh terangna pengangkanta kerna pentingna kiniersadan e. Guna mpesikap ukurta bengket ku bas Kebaktin enda mari ras kita lebe ertoto. Senina ras turang, genduari, mari dage si puji Tuhan arah Kitab Ende-Endenta nomor 71:1,3: **“Teman Si Sada Perukur”**

1. Teman si sada perukur, Si ndarami senang je
Ku bas Yesus legi ukur, Maka jumpa dame e
IA kapen ikutenta, Kita kap ngawanNa e
Tuhan Yesus kap gurunta, Kita ajar-ajarNa e
3. Kam me si persada kami, K’rina si tek baNdu e
Gelah si keleng-kelengen, Ngikutken pedahNdu e
Tudu kubar kebenaran, E me kap ateNdu pe
Kam me jadi penalemen, Gelah kami la bene

(Iher Runggun Gereja ngendesken perlengkapen Kebaktin) Perp. Tedis

II. KEBAKTIN

1. Votum Ras Salam :

L : Kebaktin enda ibenaken ibas gelar Dibata Bapa, AnakNa Jesus Kristus, ras Kesah Si Badia. Perkuah ate ras dame ibas Dibata Bapa, ras i bas Tuhan Jesus Kristus nari, i bas kerembaken Kesah Si Badia, ras kita (kam) kerina gelah. Amin.

P : Amin...Amin....Amin (iendeken)



-
2. Senina ras turang, isehken man banta kai kin si jadi sura-sura Dibata man banta nina: *“Adi sada ringring suin, kerina ringring sideban pe ikut nggejapkenca. Janah adi sada ringring ipehaga, kerina ringring si deban ikut ermeriah”, si tersurat i bas 1 Korinti 12:26.*
3. Ngaloi Pedah Dibata enda, mari ras kita muji Tuhan arah Kitab Ende-Endenta Nomor: 209:1,4 **“Perpulungen Ersadalah”**
1. Perpulungen ersadalah, Ngikutken pedahNa
Bas kiniteken tetaplah man Tuhan Dibata
Bas si mehuli ayaklah si sampat-sampaten
Bage kap pedah Dibata si keleng-kelengen
 4. Erbage-bage pemere man banta kerina
Tujunta sada me kepe terpuji Dibata
Ersada ukur me jine o Kristen ja pa pe
Anem melala ringring pe, Sada kula kepe.
4. Mari si akuken dosanta ibas ke langasupenta njagai persadan, nintalah alu responsoria: Perp. Kundul
- L : O Tuhan, enggo ipedahkenNdu man kami gelah kami ersada bagi Kam ersada ras Bapa. Alu bage tek doni enda maka Kam me Tuhan si isembah kami.
- P : O Tuhan, megati inget kami perbahanen si la uli si ibahan teman kami man kami. E maka dungna lanai kami ngasup njagai kiniersadan e.
- L : Kiniersadan si icidahken kita kempak temanta manusia, e banci jadi kesaksin si nggeluh ku sekelewetta.
- P : O Tuhan, tapi erbekas denga kap ibas pusuh kami pengerana ras perbahanenna si la uli e man kami. E maka mberat denga iakap kami ngalemi ia seh genduari.
- L : Nina Dibata arah Pustaka Si Badia: *“O teman, ola kal kam erbalas, tapi berelah dalam man Dibata guna nehken rawaNa. Sabab nina Tuhan i bas Pustaka Si Badia, “Kuukum me pagi! Kubalas me pagi!” Tapi lit kap tersurat ibas Pustaka Si Badia, “adi melihe imbangndu, bere manlah ia; adi muas ia, bere minemlah. Sabab adi bage perbahanenndu, mela dengen melas me iakapna. Ola pelepas kam talu ibahan si jahat, tapi talukenlah si jahat e alu perbahanen si mehuli. (Roma 12:19-21).*
- P : Adi bage kin Tuhan, salah kal aku, alemilah aku. Ula sehken rawaNdu bangku i bas kelangasupenku ngalemi kalak si ersalah man bangku. Pegegehi aku ras pelimbarui pusuhku gelah ngasup aku naluken si jahat alu perbahanen si mehuli.
- L+P : Amin.



-
5. Senina ras turang i bas Tuhanta Jesus Kristus, mari dage si aloi kata enda alu ras kita rende arah Kitab Ende-Endenta nomor: 292:1,3 **“Manusia ‘Nggo Erdosa”**
1. Manusia nggo erdosa, Meluat mekelesa
Pusuh labo lit damena, ‘Di sirang ras Dibata
Begikenlah pendiloNa, Ikutkenlah kataNa
Geluh pelimbaruiNa, Rembak kita ras IA
 3. Di kita la mediate, Man teman ras jabunta
I ja pe la malem ate, Di sirang ras Dibata
Begikenlah pendiloNa, Usih perbahanenNa
Sampati turang senina, Dame senang ukurta
6. Perpulungen si ikelengi Tuhanta Jesus, mari si begiken pedah Dibata gelah megegeh kita njagai kiniersadanta erpalasken Galati 5:13-15, nina: “Kerna kam o senina-seninangku, kam enggo ipilih Dibata gelah bebas. Tapi jagailah maka ola kebebasanndu e jadi alasen si erbanca kam ikuasai perukurenndu secara manusia. Tapi berelah maka keleng ate njemba-njemba kam guna si sampat-sampaten. Sabab kerina undang-undang i persada i bas sada pedah, e me, “Kelengilah temanndu manusia bagi kam ngkelengi dirindu.” Tapi adi bagi rubia-rubia perbahanenndu, si karaten dengen si atahen kam, metengetlah; adi la kam metenget nandangi kernep me persadanndu e.”
7. Tole si puji Tuhan arah Kitab Ende-Endenta Nomor: 249:1,4,5 **“Ajar Aku O Tuhanku”**
1. Ajar aku o Tuhanku, Make kata ras pedahNdu
Kueteh payo ras sentudu, Ku ikutken bas geluhku
Reff. Si ngikut pedah Dibata, Daten me kerembakenNa
Pedah kata tangkas k’rina, Em jadi gelementa
 4. Kalak si tegu Dibata, Em si lembab kin ukurna
Man si nembah rusur baNa, Ukum ajarkenNa banta
Reff. Si ngikut
 5. Mata ukur nare baNa, Gelah peratenNa siangka
Adi g’luhta ikepkepNa, Tentu malem kal ateta
Reff. Si ngikut.....
8. Senina ras turang, isehken me man banta Berita Pengalemi Dosa: “Anem dosandu megara bagi singkelat megara, jadi kang ia mbentar bagi salju. Anem gia megara bagi dareh, jadi mbentar bagi bunga. Bage nina Tuhan man bandu (banta) kerina. Amin. (bdk. Jesaya 1:18). Perp. Tedis.
9. Malem, meriah ras menahang me pusuhta sabab enggo ialemi Dibata dosa-dosanta. E maka mari si penangkih puji-pujinnta man Dibata alu kita ngendeken Kitab Ende-Enden no: 190:1,4 **“Ola Kal Lupaken Aku”**



-
1. Ola kal lupaken aku, O Yesus Tuhan
 Amin mbue kal dosangku, Masap k'rina ban
 Reff. Yesus, Yesus sapat akulah
 Bas Kam saja aku pulah, Kep-kep akulah
 4. Adi aku i bas Tuhan, Ukurku senang
 Gelah aku tetap tahan, Aku pe menang
 Reff. Yesus, Yesus.....

10. Renungan (Ertoto Ope Ras Kenca Renungan) Perp. Kundul.

Invocatio : "Adi sada ringring suin, kerina ringring sideban pe ikut nggejapkenca. Janah adi sada ringring ipehaga, kerina ringring si deban ikut ermeriah"(1 Korinti 12:26).

Renungan : Masmur 133:1-3

Tema : **"Kemalmen Ate Ibas Persadan"**

I bas mula-mulana nari Dibata nepa manusia, ijadikeNa Hawa jadi teman nggeluh si Adam. La mehuli adi manusia nggeluh sisada-sisada (Kejadin 2:18). E ertina, manusia itepa Dibata bersifat sosial "bergaul", kolektif "kebersamaan", labo nggeluh sisada-sisada entah nerap-nerapken bana. Biak si mendasar i bas manusia e me meriah iakapna erteman entah ndarami teman. Bage pe sebage perbandingan, sanga Jesus ngutus 70 kalak ajar-ajarNa, ajar-ajar enda isuruhNa dua-dua kalak sendalenen ngelebei IA ku kerina kuta ras ingan si minter ateNa idahiNa (Lukas 10:1). Adi lit temanta, tentu banci kita ras-ras arih-arih bage pe si sapat-sampaten. Tambah si e, i bas pertoton Jesus, isingetkeNa pe kerna kiniersadan ajar-ajarNa bagi kiniersadan Jesus ras BapaNa (Johanes 17:1-26).

Alu bage, teridah tuhu-tuhu maka isi Pustaka Si Badia nekanken kerna pentingna kiniersadan i bas geluhta (jabu, sangkep nggeluh), i bas pendahinta bage pe i bas tep-tep perpulgenta. Termasuk i bas Masmur 133:1-3 si jadi bahan renungenta sekali enda. Pemasmur ngatakan: *"Andiko ulina ras senangna, adi kalak si ersenina ersada perarih"* (ayat 1). Adi i bas terjemahen Bahasa Indonesia nina: *"Sungguh, alangkah baiknya dan indahnya, apabila saudara-saudara diam bersama dengan rukun."* **Ersada perarih, diam bersama dengan rukun**, e me biak-biak si ngena ate Tuhan (bdk. Pilipi 2:2). Adi pemasmur nggambarkan ersada perarih enda alu gambaren *minak wangi si meherga ras embun* si menyegarken si ipeseri alu pasu-pasu "berkat". I bas terjemahen Bahasa Indonesiana lebih jelas: *"Sebab kesanalahan Tuhan memerintahkan berkat..."*. Ertina, kalak si ersada perarih "hidup rukun" sada ras sidebanna, si igambarkan alu minak wangi ras embun ndai, ku ia me iarahken "ialamatkan" entah si ngaloken pasu-pasu Dibata e. Pasu-pasu Dibata labo pernah iarahkenNa ku kalak si rubat rusur, si cian-cianen, entah la si perkuanen.



Banci kap si bayangkan kebenaren kata pemasmur enda. Uga nge biasana cakap ras perlagu kalak rubat? Cakap si mehuli nge belaskenna? Uga pa pe lang. Nenndu kalak si cian-cianen, tenang nge iakapndu pusuhna? Tentu lang. Bage pe kalak si la si perkuanen, si mehuli nge ukurina kerna imbangna e? Uga pa pe lang. Sementara, kalak si ngaloken pasu-pasu Dibata erlayas ukurna, melala temanna, meriah iakapna di kune sikap “mehuli” keadaan jabu temanna, ras sidebanna. Bandingkanndu uga ukur Daud kenca ia itangkuhken jadi Raja Israel, mis ia ikuasai Kesah Dibata. Sementara Saul itadingken Kesah Dibata (1 Samuel 16:13-23). E maka nembah atena Daud, ibunuhna pe atena. Tapi la ibalas Daud.

Kiniersadan banci tercipta di kune kita ersada peraraih ras “*diam bersama dengan rukun*”. Di kune lit gia sekali perbahanen temannta la bagi ukurta, ula erbalas, ula si bali-bali, ula si kapit-kapit. Tapi pekenal si man pekenan. Ula bere kesempatan man si iblis (Epesus 4:27) guna ncedai persadanta. Tapi, “Daramilah kai si ngena ate Tuhan (Epesus 5:10). Alemilah salahna, totolen ia gelah ulanai ilakokenna kai si la ngena ate Dibata (inget pertoton Jesus kerna ajar-ajarNa i bas Johanes 17).

Malem me ateta adi ersada kita erturang, ersenina, ersada ras sangkep nggeluhta bage pe i bas perpulungenta masing-masing. Di kune e jadi, banci ninta: *Andiko ulina ras senangna, (Indonesia: Sungguh alangkah baiknya dan indahnya)* geluhta enda. Kerna kiniersadanta e arus tetap si baba i bas pertotonnta. Ndauh kal ulin di kune kita ersada asangkan pecah persadanta. Adi meriah ukurta ersada, e berarti Dibata je si masu-masusa. Tapi di kune pecah perpulungen e, iblis je erdahin. E maka di kune benar gia kita sekali, tapi pecah kiniersadan e, kai siakap benar e pe perlu kal ikaji ulang.

Nggeluhlah kita bagi biakta semula itepa Dibata, e me labo kita ngasup nggeluh si sada. Labo kita ngasup mengubah dunia seorang diri. Kiniersadanta e bagi kulanta enda, melala ringringna, tapi sada kula kap kita kerina. Kerina ringring e penting ras arus iergaken. Si lebe-lebenlah kita mpehaga teman, sepengejapen, sepengodak-sepengole kita i bas jabu, sangkep nggeluh bage pe i bas perpulungennta enda. Adi bage, meriah rusur siakap jumpa sada ras sidebanna. I bas jabu pe kompak, i bas sangkep nggeluh pe si dahi-dahin. I bas perpulungen pe sada usur penggejapenta, si nggalar adangen ras si langa nggalar adangen, si musil ras bayak, erpangkat ras la erpangkat, pegawai entah perjuma, kerina kita sada ringring Dibata. I lebe-lebe Dibata, bali erganta, radu ras kita kerina segambar ras rupa Dibata.

E maka, adi lit salah temanta, ula pebelin-belin entah ipembarken, ula kita ermomo man kalak sideban. Justru sebaliknya, ajari ras totoken ia gelah ulanai iulihina kesalahenna e. Adi lit imbangta erdamelah ras ia, jadikan ia temanta,



bagi nina Abraham Lincoln : *“Cara terbaik untuk menghancurkan musuh adalah dengan menjadikannya seorang teman”*. Adi lit temanta lanai tergalarina adangenna, ras-rasken i bas perpulungen e nutupisa. Adi lit temanta lanai tergalarina uang sekolah/kuliah anakna, ngeripe (pepulung penampat kasa gegeh ras ukur lit) kerina perpulungen e. Entah lanai tertukurna pupuk man si nuan-sinuanna, persada gegehta ngelitkenca. Ras banci sitambahi contoh sideban. Ula pediat si sada temanta maba babanna si mberat e. I bas suka-duka gereja tetap “hadir” mereken serpang puluh. Janah i babo si e kerina, pindo gegeh man Tuhan arah pertotonnta gelah tetap ilayasiNa ukurta ras pegegehiNa kita ngukuri ras ngelakoken si mehuli e me si sampat-sampaten, si pehagan pekepar, ras sepeggejapen, alu bage tetap terjaga kiniersadan si nteguh ras malem me ateta nggeluh.

11. Mari ras-ras kita melasken Pengakun Kinitekenta, nintalah sekalak-sekalak.....
(Perp. Tedis)

12. Nehken Persembahen Pengataken Bujur (Perp. Kundul)
Senina ras turang ibas Tuhanta Jesus, genduari ibereken me kesempatan man banta ersikap guna ngendesken persembahen pengataken bujurta man Dibata. Mari si persembahen si mehulina kal man Dibata. I bas kita ersikap ngendesken persembahenta, ikataken Dibata man banta nina: *“Ngataken bujur e me persembahen si pehagaken Aku, janah si patuh ngikutken Aku, tentu Ku kelini”*, tersurat i bas Masmur 50:23.

Janah kita ngendesken persembahenta man Dibata, mari, ras kita rende arah Kitab-Ende-Endenta Nomor: 182:1-3 **“O Tuhan Kam Tetap”**

1. O Tuhan Kam tetap, Tedehku man baNdu
Arap ku lalap Kam, Nemani geluhku
Reff. O Tuhan rasa lalap, Geluhku temani
Ola tadingken aku, Ras Kam tetap

2. O Tuhan Kam tetap, Ajarilah aku
'Lah kai pe si kuban, Mehuli man baNdu
Reff. O Tuhan.....

3. O Tuhan Kam tetap, Ras aku rembaklah
KataNdulah Tuhan, E ku ikutkenlah
Reff. O Tuhan.....

13. Mari kita bengket ku bas Pertoton Persembahen ras Syafaat-ta:
Topik pertoton syafaat :

1. Persembahen sienggo iendesken.
2. Warga GBKP tetap njaga persadan itengah-tengah kegeluhenna.
3. Simada jabu.



-
4. Ingan pulung ibas wari / berngi si pepagi.
5. Siturah ibas perpulungen.
14. Senina ras turang kerina, ope si ujugi Kebaktin Pekan Doanta berngi enda, mari dage si belasken tekadta guna njagai ras peturah biak ersada sapih-sapih kita:
- Perp. Tedis -
- L : Senina ras turang kerina, enggo si begi kata Dibata i bas wari/berngi enda kerna pentingna kiniersadan e, uga dage ninta?
- P : Bujur Tuhan arah KataNdu si enggo mpersingeti kami kerna pentingna kami njagai kiniersadan e. Nggit kami njagai kiniersadan e baik i bas jabu, i bas sangkep nggeluh bage pe i tengah-tengah perpulungen kami.
- L : Adi bage kin, kai dage tekadndu njagai kiniersadan e?
- P : Nggit aku ngalemi salah temanku, si mehuli kerna ia rusur ku inget, ertoto aku rusur gelah kerina kami ersada, alu bage dat kami me kemalemen ate i bas persadan si nteguh.
- L+P : Amin
15. Mari dage senina ras turang i bas gelar Tuhanta Jesus, si peteguhi tekadta enda alu rende arah KEE No : 381:1-3 **“Sura-Sura Yesus Bangku”**
1. Sura-sura Yesus bangku, Ersinalsal tetap
Nggeluh bujur ras mehuli, Si ngena ateNa
Reff. Ersinalsal terang, Em sinisuraken Yesus
Ersinalsal terang, Ku tetap ersinalsal
 2. Sura-sura Yesus Kristus, Nandang geluhku
Mpehaga turang senina, Si sampat-sampaten
Reff. Ersinalsal terang.....
 3. Ku pindo Yesus nampati, Njaga pusuhku e
Gelah ngasup ersinalsal, Ngikutken Tuhan e
Reff. Ersinalsal terang.....
16. Marilah si belasken Pertoton Tuhan, ninta dage ras-ras....
17. Dage, cidahkenlah biak nggit ersada baik ibas jabu, sangkep geluh ras perpulungenta enda. Guna si e, alokenlah pemasu-masun idur Dibata nari:
“Ipasu-pasu janah ikawali Dibata kita (kam), siang ayo Dibata ersinalsal ibabota (ndu), janah melias ateNa ngenehen kita (kam), itatap Dibata ku kita (kam), janah malem ateta (ndu) ibahanNa. Amin.
laloi Perpulungen : A....min...A....min....A.....min (*lendecken*)

Cataten :

1. Tedis ras kundul tupung kebaktin nehen situasi ingan kebaktin
2. Sijaga kebadian ibas kebaktin.



KEBAKTIN PEKAN DOA GBKP (I PERPULUNGEN) WARI/BERNGI IV, RABU 31 MEI 2017

I. PERSIKAPEN

- * Serayan Tuhan ngaturken kerina si perlu isikapken ibas pelaksanaan Pekan Doa wari/berngi enda, eme :
 - √ Ingan persembahen.
 - √ Si mabai Pertoton Syafaat 3 kalak : sekalak si mewakili bapa, sekalak si mewakili nande janah sekalak si mewakili anak (banci KAKR nta pe Permata).
 - √ Asa bancina gelah ipake min alat musik ibas pelaksanaan Kebaktin enda : Gitar nta pe Keyboard/Piano ras sidebanna.
 - √ Mehuli dikune banci iaturken segelah min perkundul rikutken jabu masing-masing, sada jabu kundul rembak ia kerina (bapa, nande bage pe anak).
- * Menaken kebaktin seh ku kedungenna segelah min kerina rangkaian Liturgi Pekan Doa e erdalan alu mengalir emaka kerina kita iarapken gelah mperdiateken Liturgi enda alu mehuli.

II. KEBAKTIN

1. Kata Pengalo-ngalo : i babai Tuan / Nyonya Rumah (adi ilakoken i Gereja lape ioge enda labo dalih)

Turang ras senina i bas Tuhanta Jesus Kristus, selaku Tuan/Nyonya Rumah, ikataken kami mejuah-juah ras selamat Pekan Doa man banta kerina. Man bandu kekelengen kami si sekali enda banci reh erkebaktin i bas Pekan Doa enda, ikataken kami mejuah-juah. Kerehenndu ku bas Pekan Doa enda nambahi keriahen man banta kerina bage jadi kemulian man Tuhan.

Ersentabi kal kami i bas kerina salah lepak kami lako ngalo-ngalo kerehenndu janah toto kami gelah kerina kita banci muat bagin seh ku kedungen Pekan Doa nta berngi enda. Tuhan si masu-masu kita kerina, Amin.

2. Kata Penaruh : i babai Runggun Gereja

Turang ras senina ngawan ni perpulungen Tuhan.

Sendah pulung kita lako ndalanken Pekan Doa GBKP Tahun 2017 guna wari/berngi si pe IV ken. Rikutken Pekan Doa nta si nderbih maka enggo ipersingeti kita kerina, maka arah litna persadan si mehuli itengah-tengah kegeluhenta, sie mpeturah kemalemen ateta. Kemalemen ate e eme ibas pemasu-masun Tuhan siiberekenNa arah kegeluhen si la erkeri-kerin.



Emaka, anem pe mbue perbeben geluh i doni enda, subuk ibas kegeluhenta sekalak-sekalak bage pe jabu-jabu nta tek kita maka Tuhan Dibata tetap nge nuduhkan man banta maka IA me temanta arih arah pertoton, gelah lit pengarapen ras gegehta ngalaken kerina kecibal nggeluh. Mari dage kita ngadap man Dibata si jadi temanta arih, si mereken serpang pulah i bas jabu-jabunta ndalani kegeluhen si ibereken Tuhan denga man banta.

Man bandu Serayan Tuhan siipakeNa guna ngelai i bas wari/berngi enda, iendesken kami dahin enda man bandu janah itumpak-tumpak kami kam arah pertoton rikut pe ras pemasu-masun Tuhan.

- Ertoto
- Rende : KEE No. 205 : 1
 1. Rehlah min o Tuhan, Sikap kami k'rina
Ersembah man baNdu jenda
Nusurlah min o Tuhan, Bahan sikap krina
Ukur kami pe badia,
O bapa, Bregelah, daten pasu-pasu, Kami krina enda

3. **Votum – Salam**

Perp. Tedis

L : I bas gelar Dibata Bapa si jadi ingan jabunta (ndu) guna nehken pertoton, i bas gelar Jesus Kristus si ngajari kerina isi jabunta (ndu) ertoto, ras i bas gelar Kesah si Badia si ertoto man guna jabu-jabunta (ndu) raduken ras kerina tendi isi jabunta (ndu) e.

Perkuah ate i bas Dibata Bapa, i bas Jesus Kristus nari ras i bas kerembaken Kesah si Badia ras kita (kam) kerina gelah. Amin.

P : Amin..... Amin..... Amin..... (Iendeken)

4. **Berita Kerna Perbahanen Ras Sura-sura Dibata nandangi Jabu anak-anakNa (Invocatio)**

L : “Sangap kal kalak si malang man TUHAN, si nggeluh ngikutken kerina perentahNa”. (Masmur 128:1).

Erpalasken Kata Dibata enda, sipuji IA alu ras kita ngendeken :
KEE No. 124 : 2

Senang me kap si 'rjabu sada arih, Pehaga Tuhan peratenna ras
Mehuli kal 'di ise pe la dalih, Berkat ku Minggu lah ertoto ras
'Di kebiaken gel-gel banci salih, 'Di pengerana reh hamatna pe
Bas kehamaten labo 'rlatih-latih, Ipasu-pasu Tuhan me kepe.

5. **Berita Kerna Kiniulin Dingen Kekelengen Dibata Man Jabu Ngawan ni perpulungenNa (Perp. Kundul)**



- L : Turang ras senina, Dibata mereken diriNa jadi inganta (ndu) nehken pertoton. IA setia jadi inganta (ndu) ngampeken keguluten ukur. langkaNa sora pusuhta (ndu) gia la siangka (iangkandu) nangkeli perbeben geluh. IA si mulahi bangsaNa ibas kepiceten ras kebiaren nari, dingen iteguNa pusuh si kote kempak keriahen.
- P : Kukataken bujur man bandu Tuhan. Kam kap ingan jabu kami cicio, ingan jabu kami nuri-nuri, ingan tendi kerina isi jabu kami pekesahken.
- L : Nginget perbahanen Dibata si mehuli, pujilah IA erkiteken kiniulinNa alu ngendeken : **KEE No. 402 : 1 – 3**
1. Perban kekelengenNdu, TebusiNdu dosangku
Alu mambur darehNdu, Geluhku jadi mbaru.
Asa ngasup gegehku, Kuikutken KataNdu
Yesus Kam si perkuah, Kupuji ras kusembah
 2. Perban kekelengenNdu, IbabaiNdu dalanku.
Ku dalam kesenangan, Gelah aku terkelin
Asa ngasup gegehku, Kuikutken KataNdu
Yesus Kam si perkuah, Kupuji ras kusembah
 3. Perban kekelengenNdu, JadikenNdu geluhku
Meherga ras erguna, Desken batu permata
Asa ngasup gegehku, Kuikutken KataNdu
Yesus Kam si perkuah, Kupuji ras kusembah

6. Kinata Kegeluhen Jabu i lebe-Lebe Dibata

- L : Pertoton, e me ingan jabu nuriken kerina kecibal kegeluhen jabu man Tuhan. Susah – senang, sehat – sakit, meriah ukur – ceda ate, banci ituriken rikutken pertoton e. Mari dage situriken kearun atenta ku adepen Tuhan alu pertotonta.
- P : (Ertoto i bas pusuh sekalak-sekalak).
- L : Pertoton, e me ingan jabunta mpeseh sura-sura geluh jabunta man Dibata. Sura-sura jabunta eme tetap nggeluh mehamat ras erkemalangen man Dibata maka pemasu-masuNa e tergejap i bas jabu nta. Emaka mari dage situriken sura-suranta i lebe-lebe Dibata arah pertotonta.
- P : (Ertoto i bas pusuh sekalak-sekalak)
- L : Pertoton, e me ingan jabunta nginget kerina kalak ntah pe jabu si deban si ikelengi kita, si jadi temanta mpekena-kena doni enda. Mari dage si turiken sura-suranta si mehuli kempak Dibata kerna temanta manusia bage pe jabuna.
- P : (Ertoto i bas pusuh sekalak-sekalak)



L : Mari dage sipepaguhi pertotonta alu rende arah ende-endenta : KEE No. 412 : 1 – 3

1. 'Bas toto kuendesken geluhku,
Ku Tuhan si njayam kegeluhen
Begiken min pingko-pingkongku Tuhan,
Latih mberat baban kegeluhenku
2. Ku bas tanNdu ku 'ndesken geluhku
Ku ampeken me K'rina susah ku
Jaga kawali aku o Tuhanku
'lah ula ndabuh i bas dosa aku
3. Malem tuhu adi ku endesken
K'rina perdalanan kegeluhen
Sebab Kam si negu-negu anakNdu
Si tetap setia ernalem baNdu

7. Dibata Ngaloken Pertoton Jabunta

(Perp.Tedis)

L : Turang ras senina, guna pepaguhi pengarapen ibas jabuta (ndu) man Tuhan, dengkehken dage kata Dibata kerna pertoton :

"Jabu ipanteki erpalasken kepentaren ras pengertin, janah pemeteh si reh na i bas Dibata nari mahanca jabu e idemi Tuhan alu barang-barang si meherga ras mehuli. Tapi adi lit i bas kam si kurang kepentarena, ertotolah ia man Dibata si mereken kepentaren man bandu. Sabab Dibata kap si mereken kepentaren e" (Bdk. Kuan-Kuanen 24:3-5; Jakub 1:5-8).

Meriah ukurta, Dibata tetap ertima nandangi pertoton anak-anakNa. Emaka genduari sidadahken keriahen ukurta, dengen ngataken bujur man Dibata arah ende-endenta : **KEE No. 332 : 1, 5**

1. Totonta begikenNa, Keleng ateNa kita
Ertoto isuruhNa, Em si ngena ateNa
5. I ban keleng ateNdu, Sikap tetap jing kangku
Gelah seh ku rumahNdu, Kam tetap penatahku

8. Renungen : Erpalasken Kolose 3 : 18 – 21 (Ibenaken ras idungi alu pertoton)

Tema : "Kelengi Jabundu"

- ♥ Kata "keleng" adi ikaitken ras kata "jabu" merupakan sada bagin si la terspersirang. Duana arus sendalanan, la banci si tualen dengen tetap arus lit ibas sada ras si debanna. Kekelengen si lit ibas jabu kedungenna erbahanca jabu jadi sempabu (harmonis), sepengodak sepengole, i bas ndalanken kerina si mehuli ras ngena ate Tuhan. Janah jabu si nggeluh ibas kekelengen



erbahanca jabu e banci desken “surga” man kerina isi jabu janah ulihna erbahanca panjang me jabu e. Adi kurang kekelengen i bas jabu maka jabu e banci desken “neraka” si erbahanca la lit kesikel isi jabu e lako pulung guna si ajar-ajaren, mburo ate tedeh ntah pe ngerungguken si penting ibas jabu e.

- ♥ Kekelengen e organ kap asangkan pirak ras emas (Kuan-kuanen 22:1) janah kekelengen e ka erbahanca lit kesetiaan rikut pe ras ngergaken pasangan e selaku sikerajangenna si meherga (bnd Hosea 2:19). Kekelengen e erbahanca la lit perbahanen kejahatann ibas jabu (Roma 13:10). Janah, adi jabu e semal ndalanken kekelengen segedang-gedang wari maka enda erbahanca jabu e tetap nggeluh ibas Tuhan sebab Tuhan Dibata e kekelengen kap (1 Johanes 4:8).
- ♥ I bas jabu me kita melatih kengasupen lako nggejapken ras nuduhken keleng ate Tuhan e sebab keleng ateta man Tuhan situduhken alu perbahanennta si tuhu-tuhu lako ngkelengi pasangenta bage pe isi jabu nta kerina. Enda me tindakan ntah pe perbahanen jabu kristiani si tuhu-tuhu.
- ♥ Alu bage, tema renungenta sendah si ngataken **“Kelengi Jabundu”** arus min jadi sada kinata ibas kegeluhen jabu-jabunta segelah gelar Tuhan termulia alu bage jabunta pe bahagia. Sendalanan ras renungen Pekan Doa nta nderbih, maka kemalemen ate i bas jabu e pe la terpulahi arah kegeluhen jabu si ngelakoken si ngena ate Tuhan, ersada arih dengen mabai si merim arah kerina kecibal geluh.
- ♥ I bas sie kerina, gegehta guna ndalankenca si dat arah pertotonta. Pertoton e merupaken sada bagin si esensial (sangat mendasar) i bas kegeluhen kekristenan, subuk i bas kegeluhenta pribadi lepas pribadi bage pe i bas kegeluhen jabu-jabunta. Guna banci jadi jabu si megegeh, la lit dalam si deban seyakatan isi jabu e kerina jadi sekalak *pendoa* si megegeh. Emaka nina Paulus pe, *“Ertotolah katawari pe”* (1 Tesalonika 5:17). Ertoto i bas jabu arus jadi *pusat kebutuhenta (la banci lang)*, sabab arah sie me siakuken bahwa kita perlu secara terus-menerus kehadiran Dibata. Enda ka me nuduhkenca bahwa jabu nta tetap nge erpengendes (*berserah labo menyerah*) man sura-sura Dibata maka Dibata si tetap erdahin ibas kegeluhen isi jabu e sada persada.
- ♥ **Martin Luther** mereken sada pendapatna kerna pentingna ertoto nina, *“Seperti halnya penjahit setiap hari membuat pakaian dan tukang sepatu selalu memperbaiki sepatu, demikian pula seorang kristiani seharusnya berdoa.”* Janah, sekalak teolog sekaligus pemimpin gereja Inggris si tergelar **John Henry Newman** ngatakenca, *“Doa bagi kehidupan rohani itu sama seperti detak nadi dan tarikan nafas bagi tubuh.”* Alu bage, subuk i bas

kegeluhenta pribadi lepas pribadi rikut pe i bas kegeluhen jabu-jabunta : **“Doa menolong kita memiliki prioritas yang benar, memilih hikmat yang alkitabiah, dan membuat keputusan-keputusan yang tepat.”** Arah pertoton me maka kerina isi jabu tetap ipersingeti lako ngkelengi jabu sebab alu ertoto kerina isi jabu banci mpelimbarui carana rukur lako nggeluhkan kegeluhenna alu payo subuk selaku sekalak *perbulangen*, *ndehara* bage pe *anak-anak*.

- ♥ Jabu Kristen si gagal ertoto mahan bana maka gagal ka nge ia i bas pertumbuhan jabu ku si ngena ate Tuhan e. Emaka, payo nge kai si tersurat ibas **1 Petrus 3:7** nina, *“Bage pe kam o perbulangen nggeluhlah kam alu dem pengertin nandangi ndeharandu, janah arus iangkandu maka gegehen kam asang ia. Mehamatlah kam man bana, sabap ia pe radu ras kam, ngaloken kiniulin kegeluhen si ibereken Dibata. Bagendalah perbahanenndu gelah ola lit si ngolangi pertotonndu ku Tuhan.”*
- ♥ Dikune ertoto jadi sentral (pusat) kegeluhen pertendin jabu, emaka ertoto jadi kebutuhan primer (si pemena) itengah-tengah jabu. Ulihna eme :
 - ⇒ **Ndehara** : jadi sekalak diberu si ndeherna ras perbulangenna janah pertotonna njemba ia lako nggeluh patuh man perbulangen, sabap bage me arusna ibahan selaku sekalak ndehara Kristen. Kedungenna, ndehara e jadi ingan kerina isi jabu nuriken kai saja pe si inanamina i darat jabu e. Bahkan, perbulangenna pe ngatakan :*“Nterem diberu si mehuli,”* nina perbulangenna, *“tapi i babo si e kerina kam si mehulina.”* (Kuan-kuanen 31:29). Janah, anak-anakna tetap erbahan maka megah iakap nande na e nggeluh; dengen malem ate na i bas ia enggo mupusken anak-anakna e (bnd Kuan-kuanen 23:25).
 - ⇒ **Perbulangen** : pertotonna njemba ia lako ngkelengi ndeharana alu payo. Kekelengen Kristus man manusia seh matena pe jadi usihen i bas perbulangen engkelengi ndeharana. Lit sada pendapat ngatakanca nina : *“Seorang pria mungkin saja dapat berkhotbah dengan luar biasa, menulis buku-buku inspiratif, dan mengutip ayat-ayat Alkitab dengan lancar. Namun, jika ia belum belajar melayani istri, menghormati dan memperhatikan kebutuhannya, maka kehidupan rohaninya masih seperti kanak-kanak”*. Ertina, kegeluhen pertoton sekalak perbulangen arus jadi ulu gegeh pertendinna lako engkelengi ndehara bage pe anak-anakna dengen la ia kasar man kerina isi jabuna e.
 - ⇒ **Anak-anak** : selaku sekalak anak Kristen, kedungenna ibas ulih pengajari orangtuana ntah pe nande ras bapana, njadikan anak e jadi sekalak anak si tetap patuh man orang-tua. Kerina anak-anak ngatakan

bujur man kekelengen orangtuana (Bdk. Kuan-kuanen 31:28), bage nge si ngena ate Dibata. Janah ibas kebersamaan orangtua, maka orang-tua arus min ngajarken anak-anakna lako engkelengi Tuhan Dibata e asa ukur, asa tendi ras asa gegehna lit. Janah pengajaren e arus kap ilakoken orangtua subuk sanga i rumah, ntah sanga i bas perdalanan, subuk sanga ngadi-ngadi ntah pe sanga erdahin. Labo jungut-jungut siiperluken anak sebab sie banci erbahanca bene ukurna lako ndalanken si ngena ate Tuhan i bas jabu e.

- ♥ Kegeluhen bapa, nande ras anak-anak i bas pertoton erbahanca sie kerina banci terjadi i bas jabu-jabunta sekalak-sekalak. Si penting, perlu siinget peran ta masing-masing i bas jabu e. **Ndehara** ntah pe **nande**, jadi ingan man isi jabu e lako erlajar **patuh** subuk er Dibata bage pe i bas kerina dampar kegeluhen isi jabu e. Emaka sekalak ndehara ntah pe nande aruslah jadi *tiang toto* i bas jabu e maka la oleng jabu e, la sontar jabu e tapi tetap megegeh. **Perbulangen** ntah pe **bapa**, arus jadi sekalak pelindung i bas jabu. Perbulangen ntah pe bapa e ertanggungjawab i bas kegeluhen pertendin isi jabu. Bicara kin beribadah ndai, *tidak hanya menjadi tukang hantar saja* tapi arus jadi bagin ibas perpulungen e. Kualitas jabu bage pe gereja e sendiri mbelin kal ngaruhna arah kegeluhen pertendin sekalak perbulangen ntah pe bapa e. Janah **anak-anak**, tetap jadi keriahen jabu bage pe ipersiapkan lako nerusken kerina pendahin si ngena ate Tuhan.
- ♥ Dage, man banta kerina isehken sada perenungen si arus mbages si renungen ras pe sipakeken ibas kegeluhenta : *“Kesangapen jabu e la terpulahi arah kegeluhen kerina isi jabu e malang man Tuhan dengen ngikutken kerina perintahNa.”* I bas pemasu-masun Tuhan maka jabu e ndatken kesangapen dengen nggeluh i bas dame bahkan seh cawir metua pe (Bdk. Masmur 128)
- ♥ Salah sada bentuk si nyata ibas kita ngkelengi jabu eme : *kerina isi jabu e arus ngaturken (manage) waktuna si berkualitas (la asal enggo lit) man isi jabuna, ngaturken ntah pe erbahan perencanaan perduiten jabu alu mehuli ras i bas palas arih* maka perdalanan jabu e tetap rikutken si ngena ate Tuhan.
- ♥ Dikune jabu-jabu i bas GBKP enda megegeh dengen paguh i bas palas toto maka keleng nge atena nandangi gereja e. La ia ketadingen ibas kerina dahin-dahin gereja sebab e enggo iakapna jadi sada kebutuhan primer ibas kegeluhenna.
- ♥ Selamat engkelengi jabu, jadikanlah ertoto e jadi biak kegeluhen jabu-jabunta sekalak-sekalak, Amin.

9. Pengakun Kiniteken

(Perp. Tedis)

Mari dage siakuken kinitekenta seraduken kerina kalak si tek i doni enda, nintalah dage ras-ras :

Aku tek man Dibata Bapa si la ersibar kuasaNa, sinepa langit ras doni.

Aku tek man Jesus Kristus, AnakNa si Tonggal Tuhanta, si jadi arah Kesah si Badia. Tubuh idur singuda-nguda nari, si so keliamen tergelar si Maria, si ngenanami kiniseran sangana pemerentahen Pontius Pilatus. Nipakuken ku kayu persilang, mate, jenari ikuburken, nusur ku doni kematen. Peteluwariken enggo keke ibas si mate nari, nangkih ku Surga. PerkundulNa arah kemuhen Dibata Bapa si la ersibar kuasaNa, jenari reh me IA pagi ngeranaken si nggeluh ras si enggo mate.

Aku tek man Kesah si Badia, janah lit sada gereja si badia. Persadan kalak si Badia, pengalemi dosa, kinikeken kula, kegeluhen si rasa lalap. Amin

10. Persembahen

(Perp. Kundul)

L : Turang ras senina, seh paksana siendesken persembahen pengataken bujurta si mehulina man Dibata sebab Tuhan Dibata nta pe enggo mereken si mehulina ku tengah-tengah jabunta. Kata Dibata si jadi palas man banta i bas kita ngendesken persembahen pengataken bujurta, niNa: *“Sangap kal kalak si malang man TUHAN, si nggeluh ngikutken kerina perentahNa.Ipanna me ulihna latihan, sangap nggeluh, mehuli sikerajangenna. Bage me pasu-pasu TUHAN, man kalak si malang man baNa” (Masmur 128 : 1, 2, 4).*

Tupung sipepulung persembahenta rende kita arah : **KEE No. 270 : 1 –**

1. Ermengkah ras ertoto, Em keg'luhen si payo.
Bas Kristus k'riahenta, Meteruk ukurta.
I bas senang nta susah, Kecibal geluhta
Pujilah Tuhan kataken bujur, Alu bulat ukur
2. Meder udan ras baho, Petir gelap ras lenggur
Tumpat ukurku labo, Kukataken bujur
I bas senang nta susah, Kecibal geluhta
Pujilah Tuhan kataken bujur, Alu bulat ukur
3. Kai kin erti geluhta, 'Di la muji Dibata
Kita enggo itebus , Alu dareh Kristus
I bas senang nta susah, Kecibal geluhta
Pujilah Tuhan kataken bujur, Alu bulat ukur

Pertoton Persembahen ras Pertoton Syafaat : si mabaisa asa bancina 3 kalak : Bapa, Nande ras Anak.

- 1) Kerna Persembahen.



- 2) Gelah kerina jabu-jabu i bas GBKP enda tetap ertoto maka lit gegeh jabu e guna ngkelengi jabu.
- 3) Gelah kerina isi jabu e, eme bapa, nande ras anak-anak bage pe si tading itengah-tengah jabunta, tetap ndalanken tugas ras tanggungjawabna ibas palas mehamat ras erkemalangen man Tuhan.
- 4) Gelah jabu si sangana i bas perbeben si mberat ipegegehi Dibata.
- 5) Si turah i bas perpulungen nari.
- 6) Bencana Alam i Aceh ras Gunung Sinabung.

11. Perpadanen Man Dibata

(Perp. Tedis)

- L : Dibata kap ingan jabuta ertoto, ingan jabuta nuriken isi pusuh ukur si inanami kita.
- P : Erpadan aku O Tuhan, ku babai jabu ngku segelah ku Kam me ituriken kami isi pusuh kami, Kam me ingan jabu kami erpengendes i bas kerina perbeben geluh jabu kami.
- L : Kalak si setia man Dibata, itegu Dibata kap pusuhna i bas rukur ras ndahiken si mehuli.
- P : Ateku tetap setia man baNdu Tuhan. Kam kap penggurunku i bas rukur ras ndalani kegeluhen itengah-tengah jabungku.
- L : Kalak si tutus ertoto, ikuhi Dibata alu gegeh ras kepentaren i bas ndalanken si mehuli man kerina jelma.
- P : Ateku tetap nuriken sura-sura pusuh jabungku man baNdu Tuhan, gelah ngasup jabungku e jadi pasu-pasu man kerina jelma bage pe man jabu-jabu si debanna.
- L : Teklah dengen tetaplak kita ertoto man Dibata, sabap sialoken kap kai si ipindo kita man baNa arah pertotonta.
- Sipuji Tuhan alu ngendeken : **KEE No. 327 : 1, 3**

1. Tuhan Dibata si nemani, Seh jumpa ka kita pagi
IA tetap si 'ngkawali, Tuhan Dibata si nemani
Seh jumpa kita jumpa ka, Dibata si pejumpa kita
Seh jumpa kita jumpa ka, Dibata si pejumpa kita
3. Tuhan Dibata si nemani, I bas ndele tah pe susah
IA m'reken dalam pulah, Tuhan Dibata si nemani
Seh jumpa kita jumpa ka, Dibata si pejumpa kita
Seh jumpa kita jumpa ka, Dibata si pejumpa kita

12. Pertoton Tuhan



13. Pengutusan Ras Pasu-pasu Dibata

L : Geluhkenlah geluh jabunta (ndu) i bas pertoton. Dibata ndengkehken pertoton kerina isi jabunta (ndu), jenari alokenlah pasu-pasu idur Dibata nari:

"I pasu-pasu janah ikawali Dibata kita (kam), siang ayo Dibata ersinalsal i babota (ndu), janah melias ateNa ngenehen kita (kam); itatap Dibata ku kita (kam), janah malem ateta (ndu) ibahanNa". Amin.

P : Amin..... Amin..... Amin..... (lendecken)

Cataten :

1. Sijaga kebadian i bas Kebaktinta.
2. Kundul ntah tedis iaturken sue ras inganna.



**KEBAKTIN PEKAN DOA GBKP
(I PERPULUNGEN)
WARI/BERNGI V, KAMIS 01 JUNI 2017**

I. PERSIKAPEN (IBABAI RUNGGUN GEREJA) :

- a. Ngaturken si muat bagin i bas kebaktin.
- b. Nuratken kai-kai saja si man totonken i bas syafaat (si turah i bas perpulungen).
- c. Mari sipesikap pusuh ras perukurenta guna menaken kebaktinta, ras kita rende KEE NO : 221:1,2
 1. Persikaplah ukurta, Adi ndahi Dibata
Ukur si serbut, Si lit 'bas kita. Endeskenlah man baNa
Reff :
Ban IA si mereken pengadin. Makana kita dorek min terkelin
Di Yesuslah si bahan man Temannta. E tentu malem kel ateta
 2. Pesalang pusuhnta. Adi nambah man baNa
Pusuh si gulut, si ndongkelisa. Totokenlah ku IA. Reff :
- d. Pendilo ku bas kebaktin:
Mejuah-juah man banta senina ras turang i bas kekelengen Tuhanta Jesus Kristus. Sikataken bujur man Tuhan erkiteken bekas lias ras perkuah ateNa i peatankenNa denga kita lako ngumputi Pekan Doa GBKP wari/berngi si pe limaken enda. I bas kebaktinta wari/berngi enda irakut alu tema "**Kukelengi Gerejaku**". Adi Tuhanta Jesus Kristus tuhu-tuhu enggo sampur keleng ateNa man banta. Jadi perenungen man banta, seh ija kin enggo sisehken kekelengenta nandangi gereja Tuhan? Marilah arah kebaktinta wari/berngi enda tole ipegehi kita segelah tetap muat bagin guna nehken tanggungjababta selaku anggota gereja si tutus. Man bandu serayan Tuhan ras kerina si muat bagin i bas kebaktin enda, itaruhken kami kam i bas toto, mari ras kita ertoto, ertoto kita...
- e. Sipuji Tuhan arah KEE NO : 211:1,3 (***Iher Naruhkan Si Mabai Kebaktin Ku Ingan Kebaktin***) *Perp. Tedis*
 1. *I lebe-lebe Yesus. Ku 'ndesken k'rina geluhku
Ras isi pusuh ukurku. I lebe-lebe Yesus*
 3. *I lebe-lebe Yesus. Kusehken toto man baNa
Geluhku isampatiNa. I lebe-lebe Yesus*



II. KEBAKTIN :

1. Votum, Salam

L : Kebaktin Pekan Doa wari/berngi si pelimaken enda lit i bas gelar Dibata Bapa Si njadikan kerina si nasa lit, i bas gelar AnakNa Jesus Kristus si enggo mulahi manusia i bas kiniseranna nari ras i bas gelar Kesah Si Badia si jadi ulu gegehta (ndu).

Perkuah ate ras dame i bas Dibata Bapa ras i bas Tuhan Jesus Kristus nari, I bas kerembaken Kesah si Badia, ras kita (kam) kerina gelah. Amin

Perp : Amin.....Amin.....Amin..... (lendekeu)

2. Invocatio : “Kueteh maka mbelin kal sura-surandu ngaloken pemere-pemere Kesah, tapi usahakenlah maka i bas kam lit pemere si majekken perpulungen ngelebihi pemere-pemere si deban” (1 Korinti 14:12).

3. Sipenangkih puji-pujinta man Dibata alu ngendeken KEE NO : 255:1,4

1. Talenta sini b’reken Dibatanta. Jadi min erlipat ganda

Tutus ateta ndahiken dahinNa. Amin pemberat tapina ermulia

Reff :

Kalak si malang nandangi Tuhan.

Lakap ’nggit nimbak labo ’nggit nogan

Maka dahinken ’lah alu tutus . Ola lakoken alu mekarus

4. Ulihta lit kap bas Tuhan Dibata. Mulia rikut mehaga

Adi perkisat la kel lit gunana. Jelma mejingkat maka ngena ateNa Reff :

4. Nehken keleng ate ras pengakun dosa *Perp. Kundul*

L : Senina ras turang, lit kap tersurat “Bicara beluh kal pe aku ngerana i bas kerina cakap manusia janah i bas cakap malekat pe, tapi adi la aku erkeleng ate man kalak si deban, maka kai si kubelasken e la lebih asangkan gung si erbulnang ntah pe panganak si erdeping. Aminna gia lit i bas aku pemere ernubuat, aminna gia kueteh kerina rahasia, janah lit i bas aku kerina pemeteh, aminna gia cukup kinitekenku seh maka ngasup aku mindahken deleng pe, tapi adi la aku erkeleng ate nandangi kalak si deban, sia-sia me aku. Bicara kusumbangken pe kerina erta-ertangu, janah bicara kukorbankan pe diringku seh mate guna ndatken kemegahen, tapi adi la aku erkeleng ate nandangi kalak si deban labo lit untungna man bangku... Dage lit telu si tetap arus idalanken, e me: erkiniteken man Tuhan, erpengarapen man Dibata, erkeleng ate man kalak si deban, janah si pentingna i bas si telu e, e me engkelengi kalak si deban” (1 Korinti 13:1-3, 13).



Ngaku me kita maka megati kita la ngasup ndalanken pedah Dibata, nehken keleng ate ku sekelewetta. Siakuken dosa-dosanta ras kita rende KEE No. 304:1,2

1. O, Tuhanku o, Dibatanku. Rusur aku nimbak pedahNdu Nggo meluat krina geluhku. Labo dame banna pusuhku
2. O, Tuhanku o, Dibatanku. Kutungkungken ukurku baNdu Ras mekuah ateNdu aku. Sasapkenlah salah dosanku

5. Pengalemi Dosa (Perp. Tedis)

L : Nina Tuhan “Adi ialemindu salah kalak, salahndu pe ialemi Bapandu si i Surga ka nge. Tapi adi la ialemindu salah kalak, salahndu pe la ialemi Bapandu” (Matius 6:14-15).

Meriah ukurta sabab kita pe nggo nggit ngalemi salah kalak man banta ras Dibata enggo ngalemi salahta. Mari radu ras kita rende KEE No. 269

1. Enggo masap dosanku. Krina perban dareh Yesus Malem ate tendingku. Krina perban dareh Yesus
Reff :

O, dareh Tuhanku . Si ngklini tendingku
Badia geluhku. K’rina perban dareh Yesus

2. Dame me kap pusuhku. K’rina perban dareh Yesus
Labo perban bujurku. K’rina perban dareh Yesus

Reff :

6. Renungen (Ibenai Ras Idungi Pertoton) (Perp. Kundul)

Renungen : 1 Tesalonika 1:6-10

Tema : “Kukelengi Gerejaku”

Paulus me simanteki perpulungen Tesalonika, tupung Paulus ras Silas seh i Tesalonika isehkenna Berita Si Meriah, lit kalak si tek. Kalak Jahudi ercian ate ngidah ulih pendahin Paulus ras Silas emaka iguntarkenna ras ipakena kalak si gutul-gutul i tiga guna ngguntari pendahin Paulus ras Silas. Enda me sierbahanca maka Paulus ras Silas la ndekah tading i Tesalonika (Perbahanen Rasul-Rasul 17:1-9).

Paulus tetap encidahken keleng atena nandangi perpulungen Tesalonika si enggo ipantekina. Paulus nehken suratna man perpulungen Tesalonika, arah surat me dalanna Paulus encidahken kediaten ras meritaken Berita Si Meriah. Paulus nuriken kecibal perpulungen Tesalonika:



-
- Kiniteken perpulungen Tesalonika teridah arah perbahanenna Anem gia Paulus la ndekah tading i Tesalonika guna meritaken Berita Si Meriah, lit nge piga-piga kalak si tek. Kiniteken perpulungen e tuhu-tuhu erbuah. Si e teridah arah ipujiken Paulus perpulungen Tesalonika i bas nggo ngasup ngusih Paulus ras teman-temanna (Silas ras Timotius) bagepe ngusih Tuhan. Ertina, anem gia perpulungen Tesalonika lit i bas kiniseran tapi tetap nggeluhken geluhna rikutken Berita Si Meriah.
 - Perpulungen Tesalonika jadi usihen Paulus nuriken kualitas perpulungen Tesalonika, perpulungen Tesalonika si enggo jadi usihen “Bage me kam enggo jadi usihen nandangi kerina kalak si tek si ringan i daerah Makedoni ras Akaya enda. Sabap Berita Si Meriah kerna Tuhan enggo mbar i bas kam nari labo saja ku belang-belang daerah Makedoni ras ku Akaya, tapi berita kerna kam erkiniteken man Dibata e enggo mbar ku japa pe. Lanai lit si perlu man katanken kami (1 Tesalonika 1:7-8). Perpulungen Tesalonika tuhu-tuhu nggo jadi usihen i bas kiniersadan, nggeluh sikeleng-kelengen dengen sisampat-sampaten.
 - Perpulungen Tesalonika dem keleng ate Igejapken Paulus kerna kuga belinna keleng ate perpulungen Tesalonika i bas ngalo-ngalo ia tupung reh ku Tesalonika. Tupung lit ancamen i bas kalak Jahudi nari pe, isampati perpulungen Tesalonika Paulus gelah pulah i bas kalak si gutul-gutul nari.
 - Perpulungen Tesalonika eme kalak si enggo jera ras erpengarapen Sope perpulungen Tesalonika ngaloken Berita Si Meriah, nggit me kalak enda nembah man berhala-berhala. Tapi kenca ngaloken Berita Si Meriah, itadingkenna kerina sembah-sembahenna ras nembah man Dibata si nggeluh dengen si tuhu-tuhu saja. Perpulungen e enggo nggeluhken geluhna sue ras Berita Si Meriah, alu setia nimai kerehen Jesus Kristus. Ertina, perpulungen Tesalonika nggeluh i bas pengarapen. Perpulungen e tetap ermeriah ukur anem gia arus ngenanami kiniseran i bas erkiniteken man Tuhan Jesus. Tek perpulungen e maka seh me paksana Tuhan Jesus reh mulihken, dengen ipulahina me kalak si erkiniteken i bas ukumen nari. Anem gia Paulus ras teman-temanna labo ndekah tading ringan i tengah-tengah perpulungen Tesalonika lako nehken Berita Si Meriah, tapi teridah tuhu-tuhu buah kiniteken perpulungen e. I jenda me teridah maka tep-tep kalak si enggo ngaloken Berita Si meriah, tep-tep anggota perpulungen e tek ia ras icidahkenna buah kinitekenna. Icidahkenna keleng atena man perpulungen e. Enda me sinimaksudken i bas tema wari/berngi enda ‘kukelengi gerejaku’. Selaku anggota gereja/perpulungen teridah min buah

kinitekenna alu encidahken keleng ate nandangi si ngelai i bas gereja. Adi perpulungen Tesalonika, icidahkenna keleng atena nandangi Paulus ras temamanna si reh ku tengah-tengah kalak Tesalonika. Icidahkenna pe keleng atena sapih-sapih anggota perpulungen, seh pe nggo jadi usihen man perpulungen si deban. Paulus tetap nginget perpulungen Tesalonika i bas pertonna (1 Tesalonika 1:2).

Gereja banci ikatakem misioner teridah salah sada eme tep-tep anggota gereja e nggo muat bagin i bas encidahken keleng atena. Alu bage maka mahan bana perpulungen e nggo jadi usihen man perpulungen si deban. Tep-tep anggota gereja e pe nggo muat bagin i bas nehken Berita Si Meriah. Tandana keleng ateta gerejata, totokenlah serayan Tuhan ras kerina anggota gereja. Sehkenlah penampatta nandangi temanta si lit i bas kiniseran. Man tep-tep anggota gereja enggo ibereken Dibata pemereNa si pelain-lain. Bagi siisingetken i bas invocatio "Kueteh maka mbelin kal sura-surandu ngaloken pemere-pemere Kesah, tapi usahakenlah maka i bas kam lit pemere si majekken perpulungen ngelebihi pemere-pemere si deban" (1 Korinti 14:12). Pakekenlah pemere Dibata si lit i bas kita guna majekken perpulungen, alu bage enggo si jadikan tekadta 'kukelengi gerejaku'. Labo secara kebetulen kita jadi anggota i bas sada runggun gereja, kita lit ije sura-sura Dibata segelah sibuat baginta guna kemajun-kemajun gereja e.

7. Pengakun Kiniteken *Perp. Tedis*

8. Persembahen *Perp. Kundul*

L : Kata Dibata si jadi palas man banta ibas nehken persembahen pengataken bujurta ibas Pekan Doanta i bas berngi (wari) si pe limaken enda, tersurat i bas 2 Korinti 9:9 "Kerna kalak si bage lit tersurat i bas Pustaka Si Badia, "Enggo iambur-amburna pemerena man si musil, kiniulinna e tahan seh rasa lalap." Tupung nehken persembahen pengataken bujur si puji Tuhan, rende kita arah KEE No. 209:1, 5

1. Perpulungen ersadalah, ngikutken pedahNa.
Bas kiniteken tetaplal, man Tuhan Dibata.
Bas simelihuli ayaklah, sisampat-sampaten.
Bage kap pedah Diabata, si keleng-kelengen.
2. Kerina daten pemere, dat pasu-pasu pe.
Mejingkat k'rina min dage, ndahiken dahin e.
Meteruk ukur k'rinalah, em pedah Tuhan e.
Em jadi man ikutenlah, i bas kelengNa e.



9. Pertoton Persembahen Ras Syafaat

- 1) Persembahen
- 2) Gelah kerina anggota GBKP njadikan tekad geluhna “kukelengi gerejaku”.
Tep-tep anggota GBKP nggit makeken pemere si lit i bassa guna majekken perpulungen.
- 3) Jabu ingan pulung wari enda, jabu wari pulung wari pepagi ras si ertugas wari pepagi.
- 4) Si turah i bas perpulungen.....

10. Tekad

Perp. Tedis

L : O kam si kukelengi, sikeleng-kelengenlah kita, sabap kekelengen e rehna i bas Dibata nari kap. Kalak si erkeleng ate, anak Dibata kap ia janah itandaina Dibata.

P : (ialoi perpulungen alu rende KEE No. 281:1)

1. Kek'lengen Yesus kempak manusia

Desken Dibata engkelengi ia

KekelengenNa maler kap man banta

Adi sipakelah pedahNa

Reff : Min sikeleng-kelengen kita k'rina.

Bagi pedahken Yesus bas pustaka

Sababna kai si pindo bas gelarNa

Ib're Dibata man banta

L : O kam si kukelengi, adi bagenda kin kelengna ate Dibata man banta, kita rutang sikeleng-kelengen saph-saph kita. Aminna ise pe la nggo ngidah Dibata, tapi adi sikeleng-kelengen kita, Dibata ringan i tengah-tengahta janah KekelengenNa jadi serta i tengah-tengahta.

P : (ialoi perpulungen alu rende KEE No. 281:3)

3. Bas paksa kita nehken kekelengen.

Ola min sibana ceda kempak teman

Erbana mehuli ola rahan-raham. Lah kedamen jujukken Tuhan

Reff : Min sikeleng-kelengen kita k'rina.

Bagi pedahken Yesus bas pustaka

Sababna kai si pindo bas gelarNa

Ib're Dibata man banta

11. Pertoton Tuhan, Marilah radu ras kita ertoto bagi si niajari Tuhan Yesus, ninta dage ras-ras “O Bapa kami...”



12. Pemasu-Masun

- L : Mulihlah alu dame ras mejuah-juah, dalanilah geluhta(ndu) selaku aron Dibata. Jadikénlah tekad i bas geluhta (ndu) 'kukelengi gerejaku.' Guna mpegegehi kita (kam) alokenlah pasu-pasu sirehna i bas Dibata nari:
"Dibata sumbul kemalemen ate e lah sincukupi keperlunta(ndu) guna ndalanken si sentundu ras peratenNa. Janah Dibatalah erdahin ibas kita (kam) arah Jesus Kristus gelah kita (kam) ngelakoken si ngena ateNa. Man Kristuslah kemulian seh rasa lalap. Amin.
- P : *Amin, Amin, Amin..... (lendeken)*

Cataten :

1. Sijaga kebadian ibas kebaktinta.
2. Tedis ras kundul tupung kebaktin nehen situasi ingan kebaktin.



KEBAKTIN PEKAN DOA GBKP (I PERPULUNGEN) WARI/BERNGI VI, JUMAT 02 JUNI 2017

I. Persikapen

- Sikapken 4 kalak si mbaba pertoton syafaat (P1, P2, P3,P4).
- Mehuli adi lit musik si jadi pengiring kebaktinta.
- Siusahaken suasana teneng ras dame ibas perdalanen kebaktinta.

Pertua/Diaken Si Mbaba Persikapen Ras Penaruh:

Senina ras turang sendah enggo kita seh ku bas wari/berngi pe enemken Kebaktin Pekan Doanta. Tangkas man banta maka si jadi ulu gegeh ibas ndalani kegeluhenta eme Dibata. Janah ibas wari/berngi enda tole kita ipegegehi arah kebaktinta enda guna banci kegeluhenta erguna nandangi kalak si deban. Tema si seh man banta wari/berngi enda eme "Ernanam Man Jelma Si Enterem." Enda nuduhkan maka ibas kita ndalani tahun program 2017 enda salah sada perayakenta gelah kai pe si ban kita selaku "gereja" tuhu ernanam man kalak si deban.

Mari dage ras kita ertoto mindo gegeh gelah kemahen Tuhan ipengasupNa guna ngelai ibas kebaktinta enda. Ras kita ertoto....

Mari radu ras kita rende ibas KEE 348:1-3 (Perp.Tedis, ngendesken perlengkapen simbaba kebaktin)

1. Ersembah perlu ibas doni enda, E desken bingke bas kegeluhenta. Ersembah em pedah Kata Dibata, Pehaga Tuhan bas kegeluhenta.
2. Isuruh Tuhan 'lah kita ersembah, Peturah penggejapen si meriah. Kita diloNa 'lah tutus min gelah, Ngajuk kerina teman reh ersembah.
3. Ersembah kita bas perpulungenta, Pehaga Tuhan si mada geluhta. Ersembah labo pesenang ukurta, Si sembah Tuhan 'mpehaga gelarNa.

L : Kebaktin Pekan Doa wari/berngi pe enemken enda lit ibas gelar Dibata Bapa si tetap ncukupken keperluan (ndu) guna ndalanken si sentudu ras sura-suraNa, Ibas gelar Jesus Kristus si jadi usihen ibas ndalanken peraten Dibata, ibas gelar Kesah Si Badia si mpengasup kita (kam) erguna man kalak si deban.

Perkuah ate ras dame ibas Dibata nari, kekelengen Jesus Kristus ras kerembaken Kesah Si Badia nemani kam kerina gelah, genduari nari seh rasa lalap. Amin.



P : Amin.....Amin.....Amin..... (iendeken)

L : “Bagi sira si seh kal perluna guna pangan, bage pe kam nandangi kerina manusia. Tapi adi sira e lanai masin, lanai banci ibahan masin mulihi. Sira e lanai erguna, e maka iambekken jenari idedehi kalak. Bagi terang si seh kal perluna i bas gelap, bage pe kam nandangi doni enda. Kuta si lit i das uruk la banci lang teridah” (Matius 5:13-14).

L : Mari si puji Tuhan alu ras kita rende : 354:1-3

1. Kam si Mbelin, Kam terbr’ita, Kam si termulia.

Mehuli Kam, dengen erkuasa, Kam Si mada k’rina si nasa.

Ref...

Sinalsal keleng ate Tuhan, Bagi emas si labo luntur.

Rejin tuhu dolatNdu Tuhan, Ngarak-ngarak kegeluhen.

2. Erta-erta, kebayakan, Ibas Kam nari rehna.

Kam merentah alu kuasa, Ras gegehNdu Tuhan Dibata.

Ref...

3. Genduari, O Dibata Ku Sehken bujur baNdu.

Terpuji Kam si mada kr’ina, Si ngkelengi kegeluhenku.

Ref...

(Perp. Kundul)

L : Senina ras turang, banci jadi ibas kegeluhen enda erbage baleng-baleng si erbanca kita kurang entah la mediate nandangi kiniulin kalak si deban. Malah agama si arusna mbaba kalak nggeluh reh ulina, erdame sada ras si debanna justru mbaba kalak nggeluh erbelat-belat, ernembekh ate sada ras si debanna. Ndauh kal ras kai si isuraken Dibata kerna kegeluhenta. Sura-sura Dibata maka kita ibas doni enda si erbage-bage curak kegeluhen, subuk suku, agama, bangsa ras sidebanna banci nggeluh alu dame ras si keleng-kelengen. Ngaku me kita iadapenNa si badia.

L+P: Rende: KEE 362:1

1. AlemiNdu aku bas dosangku, AlemiNdu aku bas lepaku.

O Tuhan sasap min, O Yesus sasap min, Alemi dosangku.

L : Ibereken Tuhan erbage-bage curak pendahinta sekalak-sekalak. Lit si kujuma, erbinaga, pegawai, karyawan, wira usaha ras si debanna. Sura-sura Dibata maka arah kerina pendahinta banci si cidahkan ise kin Dibata si sembah kita e. Sura-sura Dibata maka kerina pendahinta e tuhu-tuhu banci maba pasu-pasu man doni enda. Tapi si gejam nge maka mekattep denga la kita ngasup encidahken sura-sura Dibata e ibas pedahinta sekalak-sekalak. Ngaku me kita iadapenNa si badia.



L+P : Rende: KEE 362:2

2. Si la payo dem ibas geluhku, Ngaku aku baNdu o Yesusku.

O Tuhan sasap min, O Yesus sasap min, alami dosangku.

L : Ipilih Dibata ibas doni enda nari jadi bangsa pilihenNa, jadi ajar-ajarNa, jadi sikerajangenNa lako naksiken perbahanenNa man doni enda. Jadi ajar-ajar si maba perubahren ibas kegeluhen i doni enda. Bagi sira si seh perluna ibas doni enda bage me arusna kegeluhenta sekalak-sekalak. Bagi terang si erguna kal nandang kalak si ibas kegelapen bage me arusna kegeluhenta si teptep wari. Tapi sigejap maka rusur kal kita talu ibas kegeluhen enda. Kita si arusna maba perubahren ku simehuli tapi ibas kinatana maka kita si megati kita si berubah ibabai perayaken doni enda. Ngaku me kita iadepenNa si badia.

L+P : Rende: KEE 362:3

3. Ku janari 'ku baba geluhku, DengkehkenNdu min pingko-pingkoku.

O Tuhan sasap min, O Yesus sasap min, Alami dosangku.

L : Ngena ate Tuhan man anak-anakNa si nggit rusur rukur kerna kegeluhen enda. Ngena ate Tuhan man anak-anakNa si nggit ngaku kinilattungenna iadapen Dibata. Janah ngenakal ate Dibata man anak-anakNa si erkadiola nandang kerina dosa-dosana dingen ibas ukurna nggit jera. Nina Dibata man kalak si bage: *"Kam enggo erkubang-kubang ibahan dosa, tapi Kuperidi kam maka bersih bagi salju. Aminna gia erkiteken dosandu kam enggo mbiring bagi tengguang, mulihi kam jadi mbentar bagi kapas. Adi kam erkemalangen man bangKu, ipanndu me kai si mehuli ulih tanehndu enda"* (Jesaya 1:18).

L+P : Rende : KEE 423:1-2

1. Kam nebusi aku Tuhan, Kam si mpeteneng tendingku.

Tendi si ndube tertaban, TegunDu ku adepenNdu.

Ref...

Malem kal ateku Bapa, Ban keleng ateNdu.

Ku puji gelarNdu Bapa mulia gelarNdu.

Tegundulah aku Tuhan, Ibas pusuhku Kam ringan.

PetetapNdu aku Tuhan, Lah dosa talu me ku ban.

2. Kam ngalemi aku Tuhan, Kam si mpepalem pusuhku.

Pusuh si megati nogan, Mbaru perbahan kelengNdu.

Ref...

L : Mari si pesikap pusuh ras perukurenta guna megiken Kata Dibata alu ras kita rende : KEE 345:1,3



-
1. Nggo kami sikap ndengkeh KataNdu, Tuhan ng'ranalah
Nggo kami sikap megi kataNdu, Tuhan ng'ranalah
Ref....
Seh ken KataNdu man kami min, Arah kemahenNdu
Seh ken PedahNdu man kami min, Arah kemahenNdu
 3. Kam si pepanken KataNdu jine, Tuhan sampatlah
Kesah Badia ngajari kami, Megi KataNdu

L : Renungen : Ertoto sope ras kenca
Bahan : Daniel 6:1-14
Tema : Ernam Man Jelma Si Enterem

Ibas pembuangan I Babil Daniel encidahken “kualitas” kegeluhenna. “Kualitas” kegeluhenna teridah ibas dua dampar. Dampar si pemena eme kerna ketutusenna ersembah man Dibata. Enda teridah ibas ayat 10b, I das loteng rumahna e lit sada kamar jendelana ngala kempak Jerusalem. Bagi semalna, erjimpuh ia i je ertoto man Dibata telu kali sada wari, janah jendelana talang. Enda nuduhkan ketutusenna ersembah man Dibata.

Dampar si peduaken eme “kualitas” pendahinna. Tangkas isingetken ibas ayat 3, Minter teridah pendahin Daniel ndauh ulin asangkan wakil-wakil raja si debanna bage pe asangkan kerina gubernur-gubernur e. Erkiteken si e, ersura-sura raja ngangkat ia jadi wakilna ngaturken kerina kerajan. Sura-sura raja enda peturah cian ate si mesangat ibas kerina wakil-wakil raja radu ras seratus dua puluh gubernur-gubernur. Terang saja sienda erkiteken Daniel kalak buangen, labo penduduk asli, janah ia golongan kalak minoritas”

Erpala-pala kalak ras mpekeri gegeh ndarami kesalahen Daniel guna iaduken ku raja. Si menarik maka labo lit idat kesalahenna guna banci iaduken seyakatan arah “agama”na. Erdandanken sie maka si idah iban kalak enda pertakin guna nipu raja gelah banci ipedaratna perintah kidekah telu puluh wari la banci mindo kai-kai pe man dibata-dibata bage pe manusia selain man raja. Ipedarat raja keputusan enda si ija kedungenna ietehna maka enda sada jebaken si iban kalak enda guna ndarami kesalahen Daniel. Arah enda sidah maka gelgel nari pe enggo ipake isu agama guna tujun politik. Janah enda me si terjadi man Daniel. Tapi anem bage gia si idah uga pemeliharaan Dibata man kalak si tutus erkiniteken ras tutus ibas pendahinna. La ibere Dibata juru gelarNa ras



ndatkan mela kalak si tutus. Kuh dalam Dibata nelamatkan kalak si tutus ibas kiniteken ras pendahinna.

Perayakenta GBKP seh ku 2020 gelah kita mbaba pasu-pasu man doni enda. Bage pe tahun enda uga kita ibabai terus guna “berteologi secara utuh” alu tema: “Mengajar Untuk Melakukan.” Salah sada dampar si perlu si cidahken eme uga kita ernanam man jelma si enterem. Ernanam man kalak si deban. Kuncina si idah ibas wari enda eme arah dua dampar usihen si cidahken Daniel tutus ersembah man Dibata, tutus ibas pendahin si ipercayakan man bana. Enterem anggota GBKP si ibas pendahinna menentukan kegeluhen jelma si enterem. Anggota DPR, Kepala Desa, Direktur-Direktur, Camat, Bupati. Adi tutus ras sikap si ban ibas jabaten si ibere Dibata enda maka ulihna langsung inanami enterem jelma. Radu ras kerina pendahinta si deban pe maka adi tutus ras sikap si ban maka mbelin kal gunana man kalak si deban. Adi erbinaga tahu, nurung kita ula si tama zat-zat si berbahaya jadi pengawetna. Adi kita supir angkot entah bus umum maka sikap si ban mbaba motorta gelah si jadi penumpangta sikap akapna das. Kabanjahe Medan rusur macet paksa perpudi enda. Mbue ka kemaceten e erdandanken la sabar nimai seh maka si “serobot” si labo dalanta piah enggo macet.

Daniel teridah pertutusta ersembah man Dibata ibas ulih pendahinna. Arusna prinsip sienda pe nggeluh min ibas kita maka pertutusta ku gereja ras PJJ, PA ras sidebanna teridah ras tergejap min ibas kegeluhenta si teptep wari terkhusus ibas pendahinta sekalak-sekalak. Gelah kai pe pendahinta lit nanamna man kalak si deban bage pe man jelma si enterem. Enda me si kataken Jesus ibas invocatio wari enda, “jadi sira ras terang man doni.” Sira “mengubah rasa ras terang mengubah suasana. Kehadiren kalak si tek ibas kerina dampar kegeluhen maka arusna mbaba perubahren subuk nanamna reh tabehna, suasanana reh sikapna.

L : Mari radu ras kita tedis. Siakuken me pengakun kinitekenta raduken ras kerina kalak Kristen ibas kerina paksa ras ingan i doni enda ninta dage sekalak-sekalak : Aku tek man Dibata Bapa,....

(Perp. Kundul)

L : Mari ersikap kita guna ngendesken persembahen pengataken bujurta man Dibata. Kata Dibata jadi palas persembahenta eme ibuat ibas **Ulangan 8:10** *Idatndu kai atendu ipanndu. Erkiteken si e ngataken bujur me kam man TUHAN Dibatandu, kerna taneh si mehumur si iberekenNa man bandu.*



Tupung si endesken persembahenta mari radu ras kita rende ibas KEE No. 354:1-3

1. Kam si mbelin, Kam terb'rita, Kam si termulia
Mehuli Kam, dengen erkuasa, Kam si mada K'rina sinasa
Ref...
Sinalsal keleng ate Tuhan, Bagi emas si labo luntur
Rejin tuhu dolatNdu Tuhan, Ngarak-ngarak kegeluhen
2. Erta-erta, kebayaken, Ibas Kam nari rehna
Kam merentah alu kuasa, Ras gegehNdu Tuhan Dibata
Ref...
3. Genduari, O Dibata, Ku sehken bujur baNdu
Terpuji Kam, si mada krina, Singkelengi kegeluhenku.
Ref...

Pertoton Persembahen ras Syafaat

- P1 : Noteken GBKP (Ngawan Perpulungen) jadi pasu-pasu ija ia tading ras erdahin. Tutus ras terteki ibas kerina pendahinna. Subuk si kujuma, erbinaga, pegawai, anggota DPR, PNS, Direktur, Bupati ras sidebanna.
(Dung P1 maba peroton, ialoi perpulungen alu rende KEE 466)
Bujur o Tuhanku, Bujur o Tuhanku
Terpujilah gelarNdu
Bujur O Tuhanku
- P2: Notoken gelah program kerja tahun 2017 erdalan alu mehuli subuk ibas Bajem, Runggun, Klasis, Moderamen. Gelah "mengajar untuk melakukan" tuhu-tuhu teridah arah kerina perdalinen program enda.
(Dung P2 maba peroton, ialoi perpulungen alu rende KEE 466)
Bujur o Tuhanku, Bujur o Tuhanku
Terpujilah gelarNdu
Bujur O Tuhanku
- P3 : Notoken si mada jabu ibas kerina kecibal geluhna tetap ipake Tuhan mbaba pasu-pasu ibas kegeluhenna. Pasu-pasu Dibata pe tetap pendahin, kesehaten ras kerina isi jabu.
(Dung P3 maba peroton, ialoi perpulungen alu rende KEE 466)
Bujur o Tuhanku, Bujur o Tuhanku
Terpujilah gelarNdu
Bujur O Tuhanku



P4 : Notoken siturah ibas perpulungen, subuk kerna si sakit, pendahin, perbeben siturah arah erbage dampar gelah ipegegehi ras ibere Tuhan serpang pulah.

(Dung P4 maba pertoton, ialoi perpulungen alu rende KEE 466)

Bujur o Tuhanku, Bujur o Tuhanku

Terpujilah gelarNdu

Bujur O Tuhanku

(Perp. Tedis)

L : Kiniulin Tuhan icidahkenNa arah perdalinen kegeluhen kalak si tek, subuk sanga bagi ukur entah la bagi ukur.

P : Tetap ukur kami nggeluh ibas dalin Tuhan.

L : La pernah itadingken Tuhan kalak si tutus ibas kiniteken ras ibas kerina kai si dahikenna.

P : Pegegehi kami gelah banci ras tetap mbaba pasu-pasu man doni enda.

L : Si pindo gegeh gelah ngasup kita ndalanken sura-sura Dibata ibas kegeluhenta alu ras kita rende KEE 360 si endeken kari telu kali.

Ibas Tuhan aku megegeh Tuhan me ku pujiken

Tuhan me jadi gegehku, ibas IA lit kesenangan, Ibas IA lit kesenangan.....

L : Mari radu ras kita ertoto bagi siniajari Tuhan ninta dage radu ras "O Bapa kami....."

L : Alokenlah pasu-pasu idur Dibata nari si mere gegeh man bandu guna tetap tutus ibas kiniteken ras ibas kerina dampar kegeluhenta (ndu)

"TUHAN si mere gegeh dengen ampang-ampang kita (kam) Ku IA lah kita (kam) ernalem. IA si nampati ras periah ukurta (ndu), puji IA alu endenden si meriah"(bdk Masmur 28:7).

P : Amin.....Amin.....Amin (iendeken)

Catatan :

1. Sijaga kebadian ibas kebaktinta.
2. Tedis ras kundul tupung kebaktin nehen situasi ingan kebaktin.



**KEBAKTIN PEKAN DOA GBKP
(I PERPULUNGEN)
WARI/BERNGI VII, SABTU 03 JUNI 2017**

I. Persikapan

1. Ngaturken ras nikapken simuat bagin ibas ibadah si mengalir rikut kerina perlengkapan kebaktin khususna simabai pertoton syafaat (4 kalak, P1-P4).

2. Kata Penaruh

Mejuah-juah man banta kerina perpulungen Tuhanta Jesus Kristus, nandangi me seh kita kubas pendungi Pekan Doata. Tentuna enggo reh gegehna kita nggeluh ibas kerina kecibalta. Guna ndalanken kerina pedah Dibata ibas geluhta, ibereken Dibata gegeh man banta arah Kesah Si Badia. Arah e reh ngasupna kita nggeluh ibas simehuli, nggeluh ibas pertoton alu bage sura-sura simehuli tersehi kita ibas geluh sitep-tep wari. Gelah ibas pertotonta tep-tep paksa, Kesah Si Badia si ngajari kita ertoto alu payo seh maka kita pe banci nggeluh alu payo sue ras sinisuraken Dibatanta. Kedungenna kita jadi kalak Kristen si dewasa kegeluhen pertendinta, la medanak sabab e mpeturah kegeluhen sierbana-bana dengen erido-ido janah sienda labo ncidaken kegeluhen ibas Kesah Si Badia.

Mari sibenaken kebaktin enda alu erpengendes man Dibata, ara pertotonta....

3. Ertoto

4. Rende KEE No. 218:1 (naruhkan simaba kebaktin)

Nggo kenca seh ibas paksana radu ras me kita rende krina

Sipuji me gelar Dibata, M'riah cawir dage ban soranta

Si bas berita si meriah, Perukuren tetap min ergiah

Bas si la tengka minter nilah, G'luh si mbarulah madin peturah

VOTUM, SALAM, INVOCATIO

L : Kebaktin enda lit ibas gelar Dibata Bapa si njadikan doni ras isina kerina

P : *Toto kami bre man kami dame ras Kesah Badia,*

lah gelarNdu ermulia (Iendeken bagin KEE No. 118 ayat 2)

L : Ibas gelar Tuhan Jesus si enggo mere geluhNa jadi tebus dosa-dosa sinilakoken kita

P : *Toto kami bre man kami dame ras Kesah Badia,*

lah gelarNdu ermulia (Iendeken bagin KEE No. 118 ayat 2)

L : Ibas gelar Kesah Si Badia si ngkuhi kalak sitek ibas ndalani kegeluhen idoni enda



- P : *Toto kami bre man kami dame ras Kesah Badia,
lah gelarNdu ermulia (Iendeken bagin KEE No. 118 ayat 2)*
- L : Perkuah ate Tuhan Jesus Kristus, kekelengen Dibata Bapa ras kerembaken Kesah Si Badia ras kam (kita) gelah. Amin
- P : Amin.....Amin..... Amin (iendeken)
- L : Kesah Tuhan si erdolat lit ibabongku. Enggo ipilihNa aku lako maba berita si mehuli man kalak musil. IsuruhNa aku mpepalem kalak si getem pusuhna, meritaken kebebasan man kalak si tertaban, janah kalak si ibas penjara enggo banci ndarat ia (Jesaya 61:1).

Mari sipuji Dibata si Dibata si mereken kepentaren man manusia gelah nggeluh ibas kegeluhen pertendin si mehuli ibas KEE No. 118:1,3

1. O Kesah Si Badia e, Bengketi pusuh kami e, Layasi ukur kami
Trang sinisurga nari e, Nerangi ukur kami pe, Peteneng tendi kami
Maka kami sikap krina, Make pedah ras kataNdu,
Bre man kami min dameNdu.
3. Gegehi kami krina min, Ngikutken pedahNdu tetap kin
Bas kegeluhen kami.
Bas krina paksa-paksa pe, Ntah paksa kesusahen pe
Tetap temani kami.
Tuhan, Tuhan, Tegu kami, Sampat kami seh terkelin
Bre gelarNdu ku pebelin.

PUJIN MAN DIBATA SIMEREKEN PENGAJAREN: Masmur 94:12-15

- L : Sangap kal kalak si ididikNdu o Tuhan,
P : Kalak si man bana iajarkenNdu undang-undangNdu
L : IpetenengNdu ia tupung wari-wari kesusahen
P : Seh ngayak kalak jahat ndabuh ku bas lubang
Mamre : Sabab labo ietehNdu nulak bangsaNdu, o Tuhan
Moria : Labo ateNdu itadingkenNdu sikerajangenNdu
L : Emaka kinibujuren pe ipakeka mulihi
P : Janah kerina kalak bujur ngikutkenca
L : Sipuji Dibata sienggo mereken pengajaren man banta: KEE No. 249:1,4
1. Ajar aku o Tuhanku, Make kata ras pedahNdu
Kueteh payo ras sentudu, Kuikutken bas geluhku
Reff Singikut pedah Dibata, Daten me kerembakenna
Pedah kata tangkas krina, Em jadi gelementa
 4. Kalak si itegu Dibata em si lembab kin ukurna
Man sinembah rusur baNa ukum ajarkenNa banta, Reff.....



PENGAKUN KINILANGASUPEN RAS PERGEGEH

L : Dibata mereken pengajaren man banta manusia arah pedah-pedahNa megati kita ndengkehken pedah e, tapi la setia ngelakokenca ibas kegeluhenta

P : Ngaku kami Tuhan, ibas kegeluhen kami, maka kami megati tutus megimegi tapi la tutus makeken pedahNdu e, ibas kegeluhen kami. La lit gegeh kami o Tuhan, ku Kam kami reh mindo penampat.
Rende KEE No.474 (iulih 3 x)

O Yesus, o Bapangku, O Yesus sampati aku

L : Megati kal manusia buen ngerana asangken megiken pedah Dibata apai ka ngelakokenca.

P : Payo kal, iakui kami Tuhan maka la iarap kami mbue kami ngerana seh maka lanai kami metinggal nandangi pedahNdu. Ajari dengen sampati kami gelah metinggal kami kerna pengajarenNdu o Tuhan
Rende KEE No.474 (iulih 3 x)

O Yesus, o Bapangku, O Yesus sampati aku

L : Manusia meriah akapna megimegi, riahen akapna asangken ndalanken pedah Dibata e ibas geluhna

P : Babai kami Tuhan, sampati kami gelah la kami ndabuh ku bas perubaten, perdebatan si sia-sia, tapi labo kai pe ibahan kami. Sampati kami gelah ngasup ngelakoken pedahNdu
Rende KEE No.474 (iulih 3 x)

O Yesus, o Bapangku, O Yesus sampati aku

L : Dibata si sembah kita eme Dibata si sabar, perkeleng dengen mediate nandangi kegeluhen anak-anakNa. IsampatiNa anak-anakNa ndalani kegeluhen si ngena ateNa

Bagenda me nina Dibata man banta kerina: “ Ola mbiar, sabab Aku kap ras kam! Aku kap Dibatandu, emaka ola atendu aru, Kusampati kam, janah Aku mahanca kam megegeh, Kukawali kam, janah Ku kelini pe’ (Jesaya 41:10)

L : Bagenda me Dibata mpetetap ukurta ibas kerina kekotenta dengen kinilangasupenta nggeluh ibas singena ateNa. Sikataken bujur man baNa, si puji ia mari ras kita rende ibas SEE No. 148 (iulih-ulih 5 kali)
Ibas Tuhan aku megegeh Tuhan me kupujiken
Tuhan me jadi gegehku ibas IA lit kesenangan
Ibas IA lit kesenangan



RENUNGEN (Sope ras kenca dung ibahan pertoton)

Invocatio : “ Kesah Tuhan Si Erdolat lit i babongku. Enggo ipilihNa aku, lako maba berita si mehuli man kalak musil. IsuruhNa aku pepalem kalak si getem pusuha, meritaken kebebasan man kalak si tertaban, janah kalak si lit bas penjara enggo banci ndarat ia (Jesaya 61 : 1)”

Renungan : I Korinti 2 : 9 –16

Tema : “Kesah Si Badia Mereken Gegeh Ndalanken PedahNa”

Kesah Si Badia mereken gegeh ndalanken pedahNa enda me si jadi tema siniangkat bas wari/ berngi enda. Tema enda ngatakenca maka ibas ndalani wari-warinta si tep-tep wari tetaplah sipindo gelah Kesah Si Badia tetap jadi penampatta gelah ngasup kita tetap erdalan bas sura-suraNa saja. Itengah- tengah perubahren si cepat si hadapi kita bas paksa enda, tema enda pe ngatakenca man banta gelah Kesah Si Badia tetap si jadi penampat

Kota Korinti si jadi bahan renungenta bas paksa enda merupakan kota si erbage-bage kecibal kegeluhen masyarakatna tupung si e. Merupakan kota s imbue “Percampuren” budaya bage pe kiniteken. Kota enda pe mbue masyaraktna singelakoken perbahanen si la ngena ate Dibata guna ilakoken. Rasul Paulus ibas suratna man ngawan ni perpulungen i Korinti tupung sie mpersingetisa gelah “gaya hidup” si idalankenna tetap ngelakoken bagi kai singena ateNa saja. Tetap ngasup ngawan ni perpulungen i Korinti tupung si e mpertahanken kinitekenna sebage-ajar-ajar Jesus.

Arah bahan renungenta sekali enda ipersingeti Rasul Paulus gelah ngawan ni perpulungen tetap nggeluh bagi sura-sura Kesah Si Badia. Kesah e ipepayona kai pe, terus ku biak Dibata si terbuni kal pe (ayat 10). Kesah Dibata e ngenca metehsa kerina kerna Dibata (ayat 11). Sialoken kita labo biak doni enda, tapi Kesah si ibas Dibata nari gelah sieteh kerina pemere Dibata man banta (ayat 12). Isingetken Rasul Paulus pe bas bahan renungenta enda maka kalak si la lit bas ia Kesah Dibata labo ngaloken kasa kai si asalna ibas Kesah Dibata nari. La ia ngasup ngangkasa janah si lang-lang nge e iakapna, sabap arah cara pertendin nge ngenca maka si e banci iergai (ayat 14). Kalak si enggo dewasa kegeluhen pertendinna ngasup ertimbang kerna kai pe, tapi la lit kalak si ngasup ertimbang kerna IA (ayat 15). Ibas ayat 16 isingetken Rasul Paulus maka ise kin meteh perukuren Tuhan? Ise kin ngasup ngajarken IA ? Tapi ibas kita lit kap perukuren Kristus.

Arah bahan renungenta enda banci siantusi maka KesahNa njadikan kita dewasa ibas kiniteken. KesahNa mpengasup kita ertimbang ibas kai pe, bage pe ngasup guna ngangkai perukuren Dibata ras ndalankenna (Invocatio). “Kesah Si Badia Mereken Gegeh Ndalanken PedahNa”.



PENGAKUN KINITEKEN

(Perp. Tedis)

PERSEMBAHEN

(Perp. Kundul)

- L : Seh paksana kita nehken persembahen pengataken bujurta. Kata Dibata si jadi palas ras pendilo man banta guna ersembah nina ibas ibas 2 Korinti 8:7, nina “Kam sampur kap ibas kai pe ibas kiniteken, ibas ngerana, ibas pemete, ibas ketutusan
- P : Ibas kai-kai pe bagepe ibas keleng atendu nangdangi kami.
- L : Emaka sampur ka lah min kam ibas dahin keleng ate enda pe”. Iher kita nehken persembahen, sipuji Tuhan ibas Rende KEE No. 16:1,3
1. Ibas Kam Tuhan nari, Si bangku krina e.
NgaruhNdu genduari, NgaruhNdu pagi pe.
Di celus me nahengku, Keleng ateNdu kap.
Tundalen seh mateku, Kam saja si tetap.
 3. Bagi ateNdu kapen, Bage ateku min.
Lah langkah pe tetapen, Taruhken aku min.
Min erta surga bangku, Si lalap la bene.
Lah la gelap matangku, La gulut ukur pe.

PERTOTON SYAFAAT RAS PERSEMBAHEN

- PS 1 : Notoken kerna persembahen si enggo ipepulung..... ibas pendungi pertotonna ibelaskenna, “labo peratenku Bapa”.....
- P : **Labo peratenku Bapa peratenNdu jadilah**
(ialoi alu ngendeken bagin KEE No. 176)
- PS 2 : Notoken ngawan perpulungen reh ngasupna ndalanken pedah Dibata, ibas pendungi pertotonna ibelaskenna, “labo peratenku Bapa”.....
- P : **Labo peratenku Bapa peratenNdu jadilah**
(ialoi alu ngendeken bagin KEE No. 176)
- PS 3 : Notoken kerna serayan: Pt, Dk, Pdt ngasup ngelai perpulungen alu gegeh kuasa Kesah Si Badia, ibas pendungi pertotonna ibelaskenna, “labo peratenku Bapa”.....
- P : **Labo peratenku Bapa peratenNdu jadilah**
(ialoi alu ngendeken bagin KEE No. 176)
- PS 4 : Notoken siturah ibas perpulungen (idata sope ibenaken kebaktin), “labo peratenku Bapa”.....
- P : **Labo peratenku Bapa peratenNdu jadilah**
(ialoi alu ngendeken bagin KEE No. 176)



L : O Tuhan, begiklenah pertoton kami. Terpuji Kami bas kerina kecibal geluhen kami, ibas Jesus kami ertoto. Amin.

TEKAD RAS PENGUTUSEN

L : Enggo si idah kuga Dibata, alu KesahNa Si Badia nampati ras mpegegehi kita ibas kerina kecibal geluhta.

P : Iteruh perkuah ateNdu Tuhan. kami ndalani kegeluhen kami.

L : Ernalemlah man baNa, gelah reh belinna kam ibas kiniteken, seh maka ngasup ertimbang kerna kai-kai pe.

P : Pengasup kami gelah tetap nggeluh alu ndalanken pedah-pedahNdu. si naksiken kami selaku kalak si dewasa ibas kiniteken.

L : Ibas pendungi kebaktinta marilah sipuji Tuhan ibas KEE No. 451:1,4

1. Malerlah pasu-pasuNdu, Bagi ni padankenNdu.

Gegeh ras ukur si paguh, Tetap iberekenNdu.

Reff : Pasu-pasuNdu, Em ulu gegeh kami.

Enggo kap maler me tuhu, Sindemi geluh kami.

4. Malerlah pasu-pasuNdu, Bagi ni padankenNdu.

Pusuh kami pe enggo sikap, Demi salu liasNdu.

Reff...

L : Marilah kita ertoto bagi pertoton si enggo iajari Tuhan Jesus man ajar-ajarNa, ninta dage radu ras ertoto.....O Bapa kami.....

L : Mulihlah alu dame ras mejuah-juah, ernalemlah man gegeh si rehna ibas Dibata nari ndalani kegeluhenta (ndu) sitep-tep wari. Ipengasup Dibata kita (kam) alu pasu-pasuNa: *Dibata sumbul kemalemn ate e lah sincukupi keperluan (ndu) guna ndalanken si sentundu ras peratenNa. Janah Dibatalah erdahin ibas kita (kam) arah Jesus Kristus gelah kita (kam) ngelakoken si ngena ateNa. Man Kristuslah kemulian seh rasa lalap. Amin*

P : *Amin.....Amin.....Amin* (iendeken)



**GELAR TIM SI EMPERSIAPKEN
BAHAN PEKAN DOA GBKP TAHUN 2017**

1. Pdt. Yunus Bangun, M.Th
2. Pdt. Prananta Jaya Ginting Manik, S.Th MM
3. Pdt. Suenita Br Sinulingga, M.Th
4. Pdt. Nurbetty Br Ginting, M.Th
5. Pdt. Jekson Barus, M.Th
6. Pdt. Agustinus Ginting Manik, M.Th
7. Pdt. DR. Kalvinsius Jawak
8. Pdt. Dicky Bangun, M.Th



LEMBAR SARAN :

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....



LEMBAR SARAN :

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

.....

Catatan :

*Adi lit saran / masukan si tujunna guna mpekenaken/mpehuliken bahanta
enda banci ikirimkendu ku : PUSAT PEMBINAAN WARGA GEREJA (PPWG)
GBKP, Jl. Nabung Surbakti No. 2, Kabanjahe-Sumatera Utara 22115
(U.P. Pdt. Prananta Jaya Ginting Manik, S.Th MM).*